

卷十三

心藏脉論

心虛實

脉灸法

脉極

脉虛實

心腹痛

胸痺

頭面風附頭眩

卷十四

小腸腑

小腸腑脉論

小腸虛實

舌論

風眩

風癩

風虛驚悸

好忘

孫真人備急千金要方

孫真人備急千金要方卷十三

心臟方凡八類

心臟脈論第一論一首

論曰心主神者五臟專精之本也爲帝王監領四方夏王七十二日位在南方離宮火也有生之來謂之精兩精相搏謂之神所以任物謂之心神者心之藏也舌者心之官故心氣通於舌舌和則能審五味矣心在竅爲耳夫心者火也腎者水也水火相濟心氣通於舌舌非竅也其通於竅者寄見於耳左耳丙右耳丁循環炎宮上出脣口知味榮華於耳外主血內主五音心重十二兩中有三毛七孔盛精汁三合神名响响主藏神號五神居隨節應會故云心臟脈脈舍神在氣爲吞在液爲汗心氣虛則悲不已實則笑不休心氣虛則夢救火陽物得其時則夢燿灼心氣盛則夢喜笑及恐畏厥氣客於心則夢邱山烟火凡心臟象火與小腸合爲腑其經手少陰與太陽爲表裏其脈洪相於春王於夏夏時萬物洪盛垂枝布葉皆下垂如曲故名曰鈞心脈洪大而長洪則衛氣實實則氣無從出大則榮氣萌萌洪相薄可以發汗故名曰長長洪相得卽引水漿漑灌經絡津液皮膚太陽洪大皆是母軀幸得戊己用牢根株陽氣上出汗見於頭五內乾枯胞中空虛醫反下之此爲重虛脈浮有表無裏陽無所使不但危身并中其母夏脈如鈞夏脈心也南方火也萬物之所以盛長也故

其氣來盛去衰故曰鈞反此者病何如而反其氣來盛去亦盛此謂太過病在外其來不盛去反盛此謂不及

病在內太過則令人身熱而膚痛為浸淫不及則令人煩心上見咳唾下為氣泄 心脈來累累如連珠如循

琅玕曰平夏以胃氣為本心脈來喘喘連屬其中微曲曰心病心脈來前曲後居如操帶鈞曰心死 真心脈

至堅而搏如循薏苡子累累然色赤黑不澤毛折乃死 夏胃微鈞曰平鈞多胃少曰心病但鈞無胃曰死胃

而有石曰冬病石甚曰今病 心臟脈脈舍神恍惚思慮則傷神神傷則恐懼自失破脰脫肉毛色悴天死於

冬 手少陰氣絕則脈不運少陰者心脈也心者脈之合也脈不通則血不流血不流則髮不澤面黑如漆柴

者血先死壬篤癸死水勝火也 心死臟浮之實如豆麻擊手按之益躁疾者死夏心火王其脈浮大而散一作

洪曰平反得弦細而長者是肝之乘心母之歸子為虛邪雖病易治反得大而緩者是脾之乘心子之乘母為

實邪雖病自愈反得沈濡而滑者是腎之乘心水之尅火為賊邪大逆十死不治反得微澀而短者是肺之乘

心金之陵火為微邪雖病即瘥腎乘心必瘥 左手關前寸口陰絕者無心脈也若心下熱痛掌中熱時時喜

嘔口中傷爛刺手少陽治陽左手關前寸口陰實者心實也是心下有水氣憂悲發之刺手心主治陰 心脈

來累累如貫珠滑利再至曰平三至曰離經病四至脫精五至死六至命盡手少陰脈也 心脈急甚為瘰癧

微急為心痛引背食不下緩甚為狂笑微緩為伏梁在心下上下行有時唾血大甚為喉介微大為心痹引背

善淚出小甚為善噓微小為消瘴滑甚為善渴微滑為心疝引臍小腹鳴漚甚為瘖微漚為血溢維厥耳鳴癩

疾 心脈搏擊而長當病舌卷不能言其濡而散者當病瘡渴自己渴一作環赤脈之至也喘而堅詮曰有積氣

在中時害於食名心痹得之外疾思慮而心虛故邪從之扁鵲曰心有病則口生瘡腐爛 心在聲為笑在變

動為憂在志為喜喜傷心精氣并於心則喜心虛則悲悲則憂憂則笑笑則喜 時主夏病者時間時甚知其

源取其踰觀其應審其害 病先發於心者心痛一日之肺喘咳三日之肝脇痛支滿五日之脾閉塞不通身

痛體重三日不已死冬夜半夏日中 病在心日中慧夜半甚平旦靜 假令心病北行若食豚魚得之不者

當以冬時發得病以壬癸日也 凡心病之狀胸內痛脇支滿兩脇下痛膺背肩甲間痛兩臂內痛虛則胸腹

大脇下與腰背相引而痛取其經手少陰太陽舌下血者其變病刺郄中血者 心脈沈之小而緊浮之不喘

苦心下聚氣而痛食不下喜咽唾時手足熱煩滿時忘不樂喜太息得之憂思 心病其色赤心痛短氣手掌

煩熱或啼笑罵詈悲思愁慮面赤身熱其脈實大而數此為可治宜服闕宜服者藥春當刺中衝夏刺勞宮季夏刺

大陵皆補之秋刺間使冬刺曲澤皆瀉之此是手心心胞絡經又當灸巨闕五十壯背第五椎壯百 邪在心則病心痛

善悲時眩仆視有餘不足而調其輸 憂愁思慮則傷心心傷則苦驚喜忘善怒 心中風者翕翕發熱不能

起心中飢而欲食則嘔 心中寒者其人病如噉蒜薑狀劇者心痛徹背背痛徹心如蠱注其脈浮者自吐乃

愈 心傷其人勞倦頭面赤而下重心中痛徹背自煩發熱當臍跳手其脈弦此為心臟傷所致也 邪哭使

魂魄不安者血氣少也血氣少者屬於心心氣虛者其人即畏合目欲眠夢遠行而精神離散魂魄妄行陰氣

衰者卽爲癩陽氣衰者卽爲狂五臟者魂魄之宅舍精神之所依託也魂魄飛揚者其五臟空虛也卽邪神居之神靈所使鬼而下之脈短而微其臟不足則魂魄不安魂屬於肝魄屬於肺肺主津液卽爲涕泣出肺氣衰者卽泣出肝氣衰者魂則不安肝主善怒其聲呼心水者其人身體腫一作重而少氣不得臥煩而躁其陰大

腫真心痛手足清至節心痛甚者旦發夕死夕發旦死心腹痛懊懣發作腫聚往來上下行痛有休作心

腹中熱善渴涎出者是虺咬也以手聚而堅持之無令得移以大鍼刺之久持之蟲不動乃出鍼腸中有蟲虺咬皆不可取以小鍼心脹者煩心短氣臥不安凡心脈急名曰心疝小腹當有形其以心爲牡藏小腸爲

之使故小腹當有形診得心積沈而扎時上下無常處病胸滿悸腹中熱面赤咽乾心煩掌中熱甚則唾血

身瘦癯主血厥夏差冬劇色赤也心之積名曰伏梁起於臍上上至心大如臂久久不愈病煩心痛以秋

庚辛日得之何也腎病傳心心當傳肺肺適以秋壬壬者不受邪心復欲還腎腎不肯受因留結爲積故知伏

梁以秋得之心病煩悶少氣大熱熱上湯心嘔咳吐逆狂強語汗出如珠身體厥冷其脈當浮今反沈濡而

滑其色當赤而復黑者此是水之尅火爲大逆十死不治徵音人者主心聲也心聲笑其音竽其志喜其經

手少陰厥逆太陽則榮衛不通陰陽反錯陽氣外擊陰氣內傷傷則寒寒則虛虛則驚擊心悸定心湯主之見方

第十卷語聲前寬後急後聲不續前混後濁口喎冒味好自笑此爲厲風入心荆瀝湯主之方見前第八卷心虛風寒半

身不遂骨節離解緩弱不收便利無度口面喎邪薑附湯主之方見前第八卷此病不盈旬日宜急治之又笑而呻呻

而反憂此爲水尅火陰擊陽陰起而陽伏伏則實實則傷熱熱則狂悶亂冒昧言多謬誤不可採聽此心已傷  
若其人口脣正赤可療青黃白黑不可療也 心病爲瘧者令人心煩甚欲得清水反寒多不甚熱

方見前第十卷

其人本來心性和雅而忽弊急反於常白朮酒主之

方見前第八卷

或言未竟便住以手剔腳爪此人必死禍雖未及

名曰行尸此心病聲之候也虛則補之實則瀉之不可治者明以察之

赤爲心心合脈赤如雞冠者吉心主

舌舌是心之餘其人火形相比於上微赤色廣明兌面小頭好肩背脾腹小手足行安地疾行搖肩背肉滿有  
氣輕財少信多慮見事明了好顧急心不壽暴死耐春夏不耐秋冬感而生病主手少陰竅然髖髀長  
短傾正則心應之正赤色小理者則小小則邪弗能傷易傷以憂粗理者則心大大則虛虛則寒寒則憂不

能傷易傷於邪無髖髀者則心高高則實實則熱熱則滿於肺中悶而善忘難開以言髖髀小短舉者則心下

下則藏外易傷於寒易恐以言髖髀長者則心堅堅則藏安守固髖髀弱以薄者則心脆脆則善病消痺熱中

髖髀直下不舉者則心端正端正則和利難傷髖髀向一方者則心偏傾偏傾則操持不一無守司也

下云若髖髀小

短薄弱而下則心下下則虛虛則傷寒病憂恚內損心暴痛而好唾清涎口臭齒齒痛侵唇齒若髖髀高起  
則心高高則實實則熱熱則滿於心悶而善忘恐悸喉燥口痛牙癰舌傷小兒則便秘口重舌鵝口聲嘶方

見頭面 凡人部分陷起者必有病生小腸太陽爲心之部其處陷起卽病生矣藏會內外亦內外沈濁屬內

浮清居外若外病內入小腹滿起內病裏出所部陷沒外入內前治陽後補陰內出外前補陰後瀉陽陽則實

熱陰則虛寒在陽主外在陰主內凡人死生休咎則藏神前變形於外人心前病則口爲之開張若心前死則

枯黑語聲不轉若天中等分暮色應之必死不治看應增損斟酌賒促賒則不出四百日內促則不延旬月之間心病少愈而卒死何以知之曰赤黑色黯點如博碁見顏度年上此必卒死心絕一日死何以知之兩目回直視肩息立死凡面赤目白憂患思慮心氣內索面色反好急求棺槨不過十日死又面黃目赤不死赤如衄血血死吉凶之色若在於分部臍臍而見赤黑入口此必死不出其年名曰行尸若年上無應三年之中病必死矣 夏火心脈色赤主手太陽也夏取盛經分腠夏者火始治心氣始長脈瘦氣弱陽氣留滯熱熏分腠內至於經故取盛經分腠絕膚而病去者邪居淺也所謂盛經者陽脈也 其脈本在外踝之後應在命門之上三寸命門者在心上一寸也脈根在少澤少澤在手小指端 其筋起於小指之上結於腕上循臂內廉結肘內兌骨之後彈之應小指之上入結腋下其支者後走腋後廉上繞肩甲循頸出足太陽之筋前結於耳後完骨其支者入耳中直出耳上下結於頤上屬目外眥 其脈起於小指之端循手外側上腕出踝中直上循臂骨下廉出肘內側兩骨之間上循臑外後廉出肩解繞肩甲交肩入缺盆向腋絡心循咽下膈抵胃屬小腸其支者從缺盆循頸上頰至目銳眥却入耳中其支者別頰上頤抵鼻至目內眥斜絡於顴合手少陰爲表裏少陰本在兌骨之端應在背後同會於手太陽 其手太陽之別名曰支正上腕五寸內注少陰其別者上走肘絡肩髃主心生病病實則小腸熱熱則節弛弛則陽病腸脈大反逆於寸口再倍病則噤痛頰腫耳聾目黃臥不能言悶則急坐虛則小腸寒寒則生虺虺則陰病陰脈反小於寸口過於一倍病則短氣百節痛筋急

頸痛不能轉顧此盡是手太陽小腸經筋脈支別爲病今取心主胞絡少陰心經附於後手心主之別名曰內關去腕五寸甲乙作二寸出於兩筋間循

經以上繫於心包絡心系氣實則心痛虛則爲煩心取之兩筋間 手心主之脈起於胸中出屬心包下膈歷

絡三焦其支者循胸出脇下腋三寸上抵腋下循膈內行太陰少陰之間入肘中下臂行兩筋之間入掌中循

中指出其端其支者別掌中循小指次指出其端也是動則病手心熱肘臂攣急腋腫甚則胸脇支滿心中澹

澹大動面赤目黃善笑不休是主脈所生病者煩心心痛掌中熱爲此諸病盛則瀉之虛則補之熱則疾之寒

則留之陷下則灸之不盛不虛以經取之盛者則寸口大一倍於人迎虛者則寸口反小於人迎 手少陰之

別名曰通理在腕後一寸別而上行循經入咽中系舌本屬目系其實則大膈虛則不能言取之掌後一寸別

走太陽 手少陰之脈起於心中出屬心系下膈絡小腸其支者從心系上俠咽系目系系目系一作循胸出脇其直者

復從心系却上肺出腋下下循膈內後廉行太陰心主之後下肘內廉循臂內後廉抵掌後兌骨之端入掌後

內廉循小指之內出其端是動則病嗑乾心痛渴而欲飲是爲臂厥是主心所生病者目黃脇滿痛膈臂內後

廉痛厥掌中熱痛爲此諸病盛則瀉之虛則補之盛者則寸口大再倍於人迎虛者則寸口反小於人迎 手

少陰之脈獨無輸何也曰少陰者心脈也心者五臟六腑之大主爲帝王精神之所舍其臟堅固邪不能容

之則傷心心傷則神去神去則身故諸邪在於心者皆在心之包絡包絡者心主之脈故少陰無輸也少陰

無輸心不病乎曰其外經腑病臟不病故獨取其經於掌後兌骨之端也 夏三月手心小腸赤脈攢病其源

從少陰太陽之氣相搏而停則榮衛不通皮肉痛起太陽動發少陰淫邪之氣因而作則臟腑隨時受夏疫病

也其病相若腑虛則為陰邪氣所傷身戰脈掉捉所不禁若臟實則為陽毒所侵肉熱口開舌破咽塞聲嘶故

曰赤脈攢病方見傷寒卷中扁鵲云灸腎肝心三膻主治丹一作瘕毒病當依源為治表治陰陽調和臟腑疾不生矣

心虛實第二脈四首 方十一首 灸法一首

心實熱 左手寸口人迎以前脈陰實者手少陰經也病苦閉大便不利腹滿四肢重身熱名曰心實熱也

石膏湯 治心熱實或欲吐吐而不出煩悶喘急頭痛方 石膏一斤淡竹葉 香豉各一升小麥 地骨皮

茯苓三兩梔子仁三七枚 右七味咬咀先以水一斗五升煮小麥竹葉取八升澄清次下諸藥煮取二升去

滓分三服外臺名瀉肺湯

〔衍義〕靈樞云手少陰之脈獨無腧少陰心脈也心者五臟六腑之大主也精神之所舍也其臟堅固邪弗

能容也容之則傷心心傷則神去神去則死矣故諸邪之在於心者皆在於心之包絡包絡受邪則欲吐不

吐煩悶喘急故宜石膏清熱降火為主人但知石膏解利陽明熱邪不知本經原有中風寒熱心下逆氣諸

治中藏梔子豉湯主心下懊憹為清膈熱之專藥竹葉解煩清心合地骨皮主五內邪氣熱中消渴以本經

與枸杞同列不分不知實為地骨皮主治也小麥雖為肝穀能助少火而通心包與瀉心湯中用人參助長

諸藥同意彼主乾嘔故用半夏此治心熱故用石膏淡竹同治心熱而所主各有攸宜也

半夏瀉心湯 治老小下水穀不消腸中雷鳴心下痞滿乾嘔不安方 人參 黃芩 甘草各一兩 乾薑一兩

半夏連一兩 半夏半升 大棗十二枚 右七味咬咀以水八升煮取二升半分三服并治霍亂若寒加附子一

枚渴加栝蒌根二兩嘔加橘皮一兩痛加當歸一兩客熱以生薑代乾薑

大黃黃連瀉心湯 治心氣不足吐血衄血方 大黃二兩 黃連 黃芩各一兩 右三味咬咀以水三升煮取

一升頓服亦治霍亂

〔衍義〕半夏瀉心湯在傷寒治心下滿而不痛在金匱治嘔而腸鳴心下痞千金借以治下利腸鳴心下痞

滿乾嘔似與心臟無關然痞滿雖屬太陽其瑕正在心下駸駸上犯心包不得不以芩連祛熱半夏滌痰乾

薑導火人參甘棗輔正祛邪為務也 大黃黃連瀉心湯在傷寒治心下痞按之濡關上脈浮之證在金匱

治心氣不足吐血衄血與千金主治相同總取芩連以清三焦之火大黃以蕩大腑之滯乃救心包蘊熱之

專藥餘說見十卷傷寒門甘草瀉心湯下

心小腸俱實 左手寸口人迎以前脈陰陽俱實者手少陰與巨陽經俱實也病苦頭痛身熱大便難心腹煩

滿不得臥以胃氣不轉水穀實也名曰心小腸俱實

竹瀝湯 治心實熱驚夢喜笑恐畏悸懼不安方 淡竹瀝 生地黃汁各二兩 石膏八兩 芩藥 白朮 人參

梔子仁各三兩 赤石脂 紫菀 知母 茯神各二兩 右十一味咬咀以水九升煮十味至二升七合去滓下

竹瀝更煎取三升若須利入芒硝二兩去芍藥分三服

〔衍義〕胃為五臟之本心為五臟之主胃氣不得轉運外則身熱內則便難包絡之火散漫無以主持神識故用參朮茯神實其中土則火不致於乘虛內擾地黃芍藥石膏知母竹瀝梔子仁得以建清心降火之功紫苑開結氣於上石脂固藥力於下也

茯神散

治心實熱口乾煩渴眠臥不安方

茯神

麥門冬

通草

升麻

紫苑

桂心

母一兩赤石脂四十大棗二十

淡竹茹雞子大一塊

右十味治下篩為粗散以綿裹方寸七并花水二升半煮

取七合時動裹子為一服日再

〔衍義〕前竹瀝湯治胃氣不能轉運故用人參白朮杜心包火於內此以肺燥不能勝熱故用麥門冬桂心蒸發津氣於上又以升麻通草上升下泄輔佐清熱導火之方紫苑赤石脂知母茯神與前竹瀝湯不殊也

安心散

治心熱滿煩悶驚恐方

白芍藥

遠志

宿薑各二兩

茯苓

赤石脂

麥門冬

知母

紫苑

石膏各四兩人參二十桂心

麻黃

黃芩

葳蕤

甘草

右十五味治下篩為粗散先以水五

升淡竹葉一升煮取三升去滓煮散一方寸七半以絹裹時動之煎取八合為一服日再

〔衍義〕此兼竹瀝湯茯神散二方之製方中麻黃遠志葳蕤即茯苓散中升麻桂心麥門冬之義人參甘草

黃芩即竹瀝湯中人參白朮梔子之義三方合究其微則滋中寓清清中寓散散中寓清之法了然心目矣

治不能食胸中滿膈上逆氣悶熱方 灸心膻二七壯小兒減半

心虛寒 左手寸口人迎以前脈陰虛者手少陰經也病苦悸恐不樂心腹痛難以言心如寒恍惚名曰心虛寒也

茯苓補心湯 治心氣不足善悲愁怒衄血面黃煩悶五心熱或獨語不覺咽喉痛舌本強冷涎出汗一作善

忘恐走不定婦人崩中面色赤方 茯苓四兩 桂心 甘草各一兩 紫石英 人參各一兩 麥門冬三兩 大棗十二

枚赤小豆二十四枚 右八味咀咀以水七升煮取二升分三服

〔衍義〕人參茯苓補手少陰氣分石英桂心補手少陰血分甘草大棗乃參苓之匡佐麥門冬赤小豆乃英桂之報使并開泄心包旺氣以療喉舌諸疾石英兼行足厥陰而主婦人崩中以其能溫經散結也

半夏補心湯 治心虛寒心中脹滿悲憂或夢山邱平澤者方 半夏六兩 宿薑五兩 茯苓 桂心 枳實

橘皮各三兩 白朮四兩 防風 遠志各二兩 右九味咀咀以水一斗煮取三升分三服

〔衍義〕茯苓補心湯兼調肝氣半夏補心湯兼調脾氣方中桂心宿薑溫補心脾枳朮橘半溫理胃氣茯苓佐桂心下導虛陽防風佐白朮上散溼濕遠志一味通心氣之專藥

牛髓丸 通治百病虛瘠羸乏等方 牛髓 羊髓 棗膏 白蜜 酥各一升 麥門冬 芎藭 桂心 當歸

茯苓一作茯神 甘草 羌活各三兩 乾地黄 乾薑各三十兩 人參 五味子 防風各一兩 白朮四十兩 細辛十八兩 右

十九味切搗十四味篩別研棗膏和散次內諸髓蜜和攪令相得內銅鉢中於釜沸湯中煎取堪作丸如梧子大酒服三十丸稍加至四十九日再

〔衍義〕牛髓丸治百病虛羸兼調五臟以心爲君主諸臟之氣靡不稟之於君方用桂心茯苓以補心芎藭當歸以調肝乾薑白朮以溫脾人參門冬以益肺地黃五味以滋腎甘草棗膏以和胃一髓蜜酥以充髓羌防細辛以司督脈而禦外邪不但兼調五臟并以交濟陰陽則四維莫安而九重靈謐矣

心小腸俱虛 左手寸口人迎以前脈陰陽俱虛者手少陰與巨陽經俱病也病苦洞泄苦寒少氣四肢厥腸澼名曰心小腸俱虛

大補心湯 治虛損不足心氣弱悸或時妄語四肢損變氣力顏色不榮方 黃芩 附子各一兩 甘草 茯苓

麥門冬 乾地黃 桂心 阿膠各三兩 半夏 遠志 石膏各四兩 生薑六兩 飴糖一斤 大棗二十枚 右十四

味取十三味咬咀以水一斗五升煮取五升湯成下糖分四服

〔衍義〕方下所主虛損不足心氣弱悸而方所用反屬足少陰巨陽之藥其義云何夫君主之令良由相火所司故專取桂附收攝虛陽則麥門冬阿膠茯苓地黃之屬得以上充靈臺其他半夏甘草薑棗飴糖實其土臟黃芩石膏清肅心包遠志交通心腎若腎志不虧遠志似可不用水臟無泄附子儘可勿施語言無妄心包原無火擾石膏亦宜裁酌四肢安和脾陽猶能自強薑棗飴糖量減未爲不可師古人方須要得古人

意活法在心奚必固守成則哉

補心丸 治臟虛善恐怖如魘狀及婦人產後餘疾月經不調方 當歸 防風 芎藭 附子 芍藥 甘

草 蜀椒 乾薑 細辛 桂心 半夏 厚朴 大黃 猪苓各一兩 茯苓一作茯神 遠志各二兩 右十六味為

末蜜丸如梧子大酒服五丸日三不知加至十丸冷加熱藥

〔衍義〕恐怖雖屬心腎之虛然如魘狀乃虛陽鼓激痰涎湧塞心包而成正虛邪實之象虛能受熱故用薑附實能受寒故用大黃獨倍用遠志引領諸藥歸就心包以建補虛逐實之功諸臟安和則君主泰然又何必專用補心之藥乎

心勞第三論一首 方一首

論曰心勞病者補脾氣以益之脾王則感於心矣人逆夏氣則手太陽不長而心氣內洞順之則生逆之則死順之則治逆之則亂反順為逆是謂關格病則生矣

大黃洩熱湯 治心勞熱口為生瘡大便苦難閉澀不通心滿痛小腸熱方 大黃 澤瀉 黃芩 芒硝

梔子仁各三兩 桂心 通草 石膏各二兩 甘草一兩 大棗二十枚 右十味㕮咀用水九升先以水一升別浸大

黃一宿餘八升煮諸藥取二升五合去滓下大黃煮兩沸去滓下芒硝令烊分三服

〔衍義〕心勞則火氣內燔勞之太過則心氣內洞固宜補脾以益之土實則火不妄發君主自寧若火氣方

熾又須泄熱爲務硝黃石膏羣行泄熱惟取桂心爲從治之導耳

脈極第四 論一首 方一首 灸法二首

論曰凡脈極者主心也心應脈脈與心合心有病從脈起又曰以夏遇病爲脈痹脈痹不已復感於邪內舍於心則飲食不爲肌膚咳脫血色白不澤其脈空虛口脣見赤色凡脈氣衰血焦髮墮以夏丙丁日得之於傷風損脈爲心風心風之狀多汗惡風若脈氣實則熱熱則傷心使人好怒口爲赤赤甚則語言不快血脫色乾燥不澤飲食不爲肌膚若脈氣虛則寒寒則咳咳則心痛喉中介介如哽甚則咽腫喉痹故曰心風虛實候也

生地黃煎 治脈熱極則血氣脫色白乾燥不澤飲食不爲肌膚消熱止極強胃氣方 生地黃汁 生麥門

冬 赤蜜各一升 尊心一作鼓 遠志各二升 人參 白朮 茯苓 芍藥 乾地黃各二兩 甘草二兩 石膏六兩 生蕨

麩四兩 右十三味十一味咬咀以水一斗二升煮取二升七合去滓下地黃汁及蜜更煎取三升半分四

服

〔衍義〕血枯氣脫脈極而咳故用二地芍藥以滋血參苓朮甘以益氣門冬蕨麩以潤肺尊心石膏以清胃遠志赤蜜以通心而行諸味膩滯之性也

灸法

胸中痛引腰背心下嘔逆面無滋潤灸上門隨年壯穴在俠巨闕兩邊相去各半寸一寸云 顏色焦枯勞氣失

精肩臂痛不得上頭灸肩髃百壯穴在肩外頭近後以手按之有解宛宛中

脈虛實第五 論一首 方三首 鍼灸法二首

論曰凡脈虛者好驚跳不定脈實者洪滿凡脈虛實之應主於心小腸若其腑臟有病從熱生則應臟寒則應腑也

防風圓 補虛調中治脈虛驚跳不定乍來乍去主小腸腑寒方 防風 桂心 通草 茯神 遠志 麥

門冬 甘草 人參 白石英 各三兩 右九味為末白蜜和丸如梧子大酒服之十九日再加至四十丸

〔衍義〕脈虛而用桂心石英遠志當矣反用防風為主兼木通同入手足太陽引領人參茯神等味歸就心

與小腸千金奧旨於此稍露一斑特為拈出以開學人心目

升麻湯 治脈實洪滿主心熱病方 升麻 子芩 澤瀉 梔子仁 淡竹葉 芒硝 各三兩 生地黃 切一升

右七味咬咀以水九升煮取三升去滓下芒硝分三服

〔衍義〕脈實洪滿心與包絡邪實之應心主血故用生地黃黃芩涼血為主然火逆上僭非芒硝梔子竹葉

澤瀉并通二陰不能旋折其威又需升麻開發於上分解蘊隆之勢也

麻黃湯 調心洩熱治心脈厥大寸口小腸熱齒齟噓痛方 麻黃 生薑 各四兩 細辛 子芩 茯苓 芍藥

各三兩 白朮 二兩 桂心 一兩 生地黃 切一升 右九味咬咀以水九升煮取三升去滓分三服須利加芒硝三兩

〔衍義〕心脈厥大言左寸沉伏而按之益大應指厥厥動搖故宜生地黃黃芩清利伏熱卽以麻桂薑辛溫散結茯苓白朮填其空以杜火氣之復入芍藥爲地黃之佐使勢甚則加芒硝與前升麻湯法不殊

### 鍼灸法

脈不出鍼不容穴在幽門兩傍各一寸五分是 心悶痛上氣牽引小腸灸巨闕二七壯

### 心腹痛第六

論一首 二十六首  
製蒸一首 針灸法二十五首

論曰寒氣卒客於五臟六腑則發卒心痛胸痺感於寒微者爲咳甚者爲痛爲泄厥心痛與背相引善癢如物從後觸其心身僂偻者腎心痛也厥心痛腹脹滿心痛甚者胃心痛也厥心痛如以鍼錐刺其心痛甚者脾心痛也厥心痛色蒼蒼如死灰狀終日不得太息者肝心痛也厥心痛臥若從心間痛動作痛益甚色不變者肺心痛也真心痛手足清至節心痛甚旦發夕死夕發旦死虵心痛腹中痛發作腫聚往來上下行痛有休止腹中熱善涎出是虵咬也以手按而堅持之勿令得移以大鍼刺之復久持之蟲不動乃出鍼心下不可刺中有成聚不可取於脬腸中有蟲虵咬皆不可取以小鍼

治寒氣卒客於五臟六腑中則發心痛方

大黃

芍藥

柴胡

升麻

黃芩

桔梗

硃砂

鬼臼

鬼箭羽

桂心

朴硝

各二兩

右十一味

咬咀

以水九升

煮取二升

七分

合分三服

先分硃砂

作三分

每服內

一分攪勻服之得快利如痛不止宜服後方

赤芍

六兩

桔梗

杏仁

各五兩

右三味

咬咀

以水六升

煮取

三升分三服

〔衍義〕邪有寒熱之辨痛有臟腑之分而此統言寒熱臟腑者以寒邪伏久而蘊熱毒煥發於臟腑故用升柴開發於上硝黃蕩滌於下桂芍破寒熱而因結衛茅散賊風惡血鬼臼辟惡氣不祥丹砂攝浮遊諸邪黃芩清肌表之熱桔梗利膈上諸氣氣血和而臟腑安痛當自止設得快利而痛猶未除者此因結雖通而氣血未調也但須赤芍杏仁桔梗調血和營清膈利氣氣血平而痛自愈不得復行攻擊也

九痛丸

治九種心痛并療冷衝上氣落馬墮車血疾等方

一蟲心痛二疰心痛三風心痛四悸心痛五食心痛六飲心痛七冷心痛八熱心痛九來去心痛此

之謂九痛

附子

乾薑各二兩

吳茱萸

人參

巴豆

各一兩

生狼毒

四兩

右六味為末蜜和丸如梧子大空腹

酒服三丸卒中惡腹脹痛口不能言者服五丸日一服連年積冷流注心胸者亦服之好好將息神驗金匱方用

附子三兩乾薑狼牙各一兩

〔衍義〕

金匱九痛丸本隸胸痹門後治九種心痛原方用附子三兩乾薑一兩意在辟除腎氣凌心也千金

改用附各二兩意在兼理胃中陳積也又原方用生狼牙一兩千金以其難覓改用狼毒四兩以狼毒性

緩不若狼牙之力銳且千金首言蟲心痛故專殺蟲為務濟以巴豆吳茱萸之迅烈助以人參之振胃驅邪

而方仍列心臟門者以諸痛靡不本於血病血則心之所主也喻嘉言曰九種心疼乃客邪之劇証即腎氣

凌心脚氣衝心之別名也痛久血淤陰邪搏結温散藥中加生狼牙巴豆吳茱萸驅之從陰竅而出以其邪

據胸中結成堅壘非搗其巢邪終不出耳

治九種心痛方 取當太歲上新生槐枝一握去兩頭咬咀以水三升煮取一升頓服

〔衍義〕槐本虛宿之精益腎清心凡心痛屬血熱者宜之

桂心三物湯 治心中痞諸逆懸痛方 桂心 生薑各二兩 膠飴半斤 右三味取二味咬咀以水六升煮取

三升去滓內飴分三服 仲景用枳實五枚不用膠飴肘後用枳實五枚白朮二兩為五味

〔衍義〕桂心通心氣散血結生薑去穢氣通神明膠飴和脾氣緩急痛凡心痛之屬虛冷者宜之

崔氏烏頭丸 治心痛徹背背痛徹心方 烏頭六銖 附子 蜀椒各半兩 乾薑 赤石脂各半兩 右五味為末

蜜丸如梧子大先食服三丸日三不知少增之 范汪不用附子服如梧子二丸崔氏用桂心半兩為六味

〔衍義〕胸中陽氣不布陰邪襲據所以心痛徹背背痛徹心故金匱取崔氏烏頭赤丸更其名曰赤石脂丸

以烏附椒薑之辛烈破陰復陽石脂之重瀦填塞陰邪往來之路也

治心痛方 桃白皮煮汁空腹以意服之 崔氏用療疰心痛

治暴心痛或如中惡口中涎出不可禁止回回欲吐方 苦參一斤 右一味咬咀以水一石煮取二斗去滓

下苦酒二斗更煮取五升加大黃末熬和煮汁中煎令可丸并手丸之如梧子大每服以酒一升浸三四十

丸日一當倒腹吐不吐下利更酒浸苦參二斤浸久彌佳非止暴痛如髀骨節等痛凡是腹中之疾悉主之

又治宿冷血結陰癰頻用有效大良

治卒中惡心痛方 苦參三兩 右一味咬咀以好酢一升半煮取八合強者頓服老小分二服○又方 桂

心一兩 右一味咬咀以水四升煮取一升半分三服

治蟲心痛方 鶴蝮為末蜜丸如梧子大服四十九丸蜜湯下日一服可加至五十九丸慎酒肉○又方 鶴蝮一

兩為末温酢一盞和空腹服之蟲當吐出○又方 服漆一合方見後養生服餌篇中凡蟲心痛皆用漆主

之

〔衍義〕桃白皮活血通膈膜滯血 苦參汁入苦酒下大黃末治腹中熱血去宿冷血結陰癰者始由冷積

終變鬱熱也 卒中惡心痛輕者只用苦參苦酒煮服以湧泄之 桂心治瘡冷結血 鶴蝮治蟲疰心痛

取蜜凡誘入蟲口也 鶴蝮温酒和服者取其上涌也 漆能殺蟲然須煨灰用之

五辛湯 治心腹疼痛方 細辛 蜀椒 桂心 乾薑 吳茱萸 芍藥 防風 苦參 甘草 當歸

乾地黄各二兩 梔子 烏梅 大棗各十枚 右十四味咬咀以水九升煮取三升分四服

〔衍義〕細辛椒薑莢桂以散心腹結痛苦參梔子兼歸芍地黄以和營血蘊熱甘草大棗以和五辛二苦之

性并和胃氣行藥力也其妙用尤在防風開發衛氣以通蘊結於外烏梅宣播胃氣以收津液於內也

犀角丸 治心腹久痛積年不定不過一時間還發甚則數日不能食又便出乾血窮天下方不能瘥甄立言

處此方數日即愈 犀角 麝香 雄黃 桔梗 莽草 鬼臼 桂心 芫花各半兩 甘遂一兩 附子 光

明砂各六錢 貝齒五枚 巴豆二十枚 赤足蜈蚣二枚 右十四味為末蜜丸如梧子飲服一丸日二漸加至三丸

以微利為度古今集驗無雄黃

〔衍義〕心腹久痛積年不定而至便血不食此必毒邪伏匿於幽隱之處故立言專以犀麝雄黃等味辟除

惡毒為主明砂鎮心安神貝齒磨堅破血桂附鼓激諸藥之性也

高良薑湯 治心腹絞痛如刺兩脇支滿煩悶不可忍方 高良薑五兩厚朴二兩當歸 桂心各三兩 右四

味咬咀以水八升煮取一升八合分二服日三若一服痛止便停不須更服强者作二服弱者分三服

〔衍義〕心腹絞痛而見脇滿如刺明係木邪凌上之實證故用良薑厚朴溫散滯氣當歸桂心溫散結血兼

行心肝肺三經以破寒積也

當歸湯 治心腹絞痛諸虛冷氣滿痛方 當歸 芍藥 厚朴 半夏各二兩 桂心 甘草 黃芪 人參各二

兩乾薑四兩蜀椒一兩 右十味咬咀以水一斗煮取三升二合分四服羸弱人分六服小品云人冷加附子一枚良

〔衍義〕高良薑湯專主寒結暴痛當歸湯專主虛滿久痛改於前方裁去良薑之壯火易入乾薑以溫中兼

芍藥佐當歸半夏佐厚朴蜀椒佐桂心以除旺氣參芪甘草保元氣也

又方 治虛冷腹痛不下飲食食復不消膨脹者方 當歸 茯苓各五錢 黃芪 紫苑各四錢 高良薑 乾薑各六

分鹿茸 桂心 肉蓯蓉 昆布 橘皮各三 甘草 二兩 烏頭 二兩 大棗四十 桃仁一百 地骨皮 法麴

大麥各一 升 右十八味咀咀以水一斗五升煮取四升二合分為五服下利加赤石脂龍骨各三分渴加

麥門冬一升

〔衍義〕方中夏薑乾薑合上二方之義麴蘖橘皮昆布卽上方厚朴半夏之義鹿茸蓯蓉卽上方人參保元之義桃仁卽上方芍藥佐當歸之義烏頭卽上方蜀椒佐桂心之義其他茯苓紫苑大棗地骨皮專解二薑之辛燥也

又方 治寒冷腹中痛方小品云吳茶黃湯 當歸 二兩 桂心 甘草 人參各一 生薑 五兩 半夏 小麥各一 吳茱萸

二升 右八味咀咀以水一斗五升煮取三升分三服日三亦治產後虛冷

〔衍義〕千金以南陽陽明例中吳茱萸湯去大棗之戀腦易甘草以緩痛當歸桂心助吳茱萸以溫血小麥助人參以益氣半夏助生薑以滌痰痰清氣溫而痛自除乃南陽法中之旨故小品仍以吳茱萸湯名之

又方 治冷氣脇下往來衝胸膈痛引脇背悶者方 當歸 桂心 人參 甘草 吳茱萸 芍藥 大黃

各二 茯苓 枳實各一 乾薑 三兩 右十味咀咀以水八升煮取二升半分三服日三並治尸疰亦佳外臺仲景

方無茯苓枳實

〔衍義〕前方意在祛痰故用半夏佐生薑以散結此方意在蕩實故用乾薑佐茱萸以泄滿茯苓佐人參以

助氣芍藥佐桂心以和血枳實佐大黃以導滯當歸和血甘草和中心腹諸痛之所必需以其人本虛邪實非人參薑桂不能助枳實大黃開結導滯之力也

又方 治久寒疾胸腹中痛時下利方 當歸三兩附子一兩乾薑 甘草 柑皮各二兩 右五味啖咀以水

八升煮取二升分三服日三

〔衍義〕胸腹久痛而至時下利陰邪浸淫已極非通脈四逆無以恢復元陽兼當歸之辛溫以和營血柑皮之辛涼以清旺氣柑取粵東高涼化州者為勝附以蜀川成都者為優

又方 治久寒宿疾胸腹中痛短氣時滯下利方 當歸 桂心各三兩 乾薑四兩附子一兩 右四味啖咀以

水八升煮取二升分三服日三范汪無附子有甘草二兩云虛冷激痛甚者加黃芪芍藥各二兩

〔衍義〕此以前方除去甘草之甘緩柑皮之辛散特進桂心配當歸薑附以峻溫營血也

溫中當歸湯 治心腹中痛發作腫聚往來上下痛有休止多熱喜涎出是虺蟲啖也二三劑後若不效有異

宜改方增損之 當歸 人參 乾薑 茯苓 厚朴 木香 桂心 桔梗 芍藥 甘草各二兩 右十

味啖咀以水八升煮取三升分溫五服日三不耐木香者以犀角一兩代之

〔衍義〕方下所主渾是蟲積患痛而用諸藥咸係溫中之品惟桂心入心助火亦能散火厚朴木香得參苓

桂薑迅掃堅積倘素稟津枯不勝燥烈者則以犀角代木香一味冰炭殊途而散結之力則一

羊肉當歸湯 治腹冷絞痛方 羊肉半斤當歸四兩乾薑 橘皮 黃芪 芍藥 芎藭 桂心 獨活

防風各三兩 吳茱萸 人參 甘草 乾地黃 茯苓各一分 生薑六分 大棗三十枚 右十七味咬咀以水一斗

半先煮羊肉取一斗出肉內諸藥煮取三升分三服日三覆取温煖

〔衍義〕金匱當歸生薑羊肉湯專主產後腹中疝痛及寒疝腹脇急痛千金本之以治腹中絞痛蓋絞痛與疝痛雖有衝擊結滯之不同而和營散結之治則一如本方合小建中黃芪建中以治虛勞裏急諸不足合理中入珍以治氣血虛寒諸不足合吳茱萸湯三物大建中以治胃虛嘔逆諸不足建中方中除去膠飴之粘滯理中入珍方中除去白朮之壅閉大建中方中除去蜀椒之耗氣更加獨活防風佐黃芪以禦外內合邪橘皮佐薑桂以滌涎飲下滯氣也

温脾湯 治腹痛臍下絞結遠臍不止方 甘草 附子 人參 芒硝各一兩 當歸 乾薑各三兩 大黃五兩

右七味咬咀以水七升煮取三升分服日三

〔衍義〕臍下腹中明係少陰部分故其治不離通脈四逆湯為主然結痛不止又須附子瀉心湯以芩連易芒硝而峻攻之加當歸人參以助血氣辛陰邪陰邪散則陽和布土膏煖則君澤施瀉心非在芩連温脾專賴硝黃能達斯義則千金以是方歸之心臟有著落矣

生薑湯 治胸腹中卒痛方 生薑一斤 食蜜八兩 醪醕四兩 右三味微火上耗令相得適寒温服三合日三

〔衍義〕胸腹中卒痛審無宿滯固結但需生薑以散虛火之逆酥蜜以滋津血之燥不煩猛劑峻攻也

熨蒸法

凡心腹腹冷痛者 熬鹽一斗熨或熬蠶沙燒磚石蒸熨取其裏溫煖止蒸土亦大佳

〔衍義〕鹹能順下熬之以導火氣蠶沙以逐內犯之風濕

鍼灸法

凡邪在心則病心痛善悲時眩仆視有餘不足而調其膻 腎心痛先取京骨崑崙發鍼不已取然谷 胃心

痛取大都太白 脾心痛取然谷太谿 肝心痛取行間太衝 肺心痛取魚際大淵 心痛引腰脊欲嘔刺

足少陰 心痛引背不得息刺足少陰不已取手少陰 心痛腹脹瀉瀉然大便不利取足太陰 心痛小腹

滿上下無常處洩便難刺足厥陰 心痛短氣不足以息刺手太陰 心痛不可按煩心巨闕主之 心痛有

三蟲多涎不得反側上腕主之 心痛身寒難以俯仰心疝衝胃死不知人中腕主之 心痛如鍼錐刺然谷

及太谿主之 心腹中卒痛石門主之 心疝暴痛取足太陰 心懊懣微痛煩逆灸心膻百壯 心痛如錐

刀刺氣結灸膈膺七壯 心痛冷氣上灸龍領百壯在鳩尾頭上行一寸半不可刺之 心痛惡氣上脇急痛

灸通谷五十壯在乳下二寸 心痛暴絞急絕欲死灸神府百壯在鳩尾正心有忌 心痛墜煩氣結灸太倉

百壯 心痛暴惡風灸巨闕百壯 心痛灸臂腕橫文三七壯又灸兩虎口白肉際七壯

胸痹第七論二首 方十二首  
灸法五首

論曰胸痹之病令人心胸堅滿痞急痛肌中苦痺絞急如刺不得俛仰其胸前皮皆痛手不得犯胸中幅幅而滿短氣咳唾引痛咽塞不利習習如癢喉中乾燥時欲嘔吐煩悶自汗出或徹引背痛不治之數日殺人

〔衍義〕胸痹一證古所未詳世亦罕究金匱始發其端千金繼統其緒首言心中堅滿痞急痛形容病根盤結之狀最切肌中苦痺絞急如刺不得俛仰胸前皮皆痛手不可犯有諸內必形諸外也胸中幅幅而滿短氣咳唾引痛咽塞不利氣道阻逆也習習如癢喉中乾燥氣有餘便是火也時欲嘔吐自汗出火從內外尋出路也徹引背痛背者胸之府也不治之數日殺人極言其證之劇然病有淺深不可槩以爲限也

論曰夫脈當取太過與不及陽微陰弦卽胸痹而痛所以然者責其極虛故也今陽虛知在上焦所以胸痹心痛者以其人脈陰弦故也

〔衍義〕趙以德云陽微在胸中氣分上看故曰陽微知在上焦陰弦在陰脈上看如陰寒之脈上于胸中氣分則爲胸痹如陰氣上乘於心則爲心痛也

平人無寒熱短氣不足以息者實也

〔衍義〕上條是言不及此則言太過也平人蓋言無內傷外感而患短氣不足以息者當是胸中邪氣壅塞腎中陽氣不得上通於胸中故爲實也

二金要方 卷十三 十一  
栝蔞湯 治胸痹病喘息咳唾胸背痛短氣寸脈沉而遲關上小緊數方 栝蔞實一枚半夏半升薤白半斤

枳實二兩生薑四兩 右五味咀咀以白酒漿一斗煮取四升服一升日三仲景肘後不用生薑枳實半夏

〔衍義〕金匱首列栝蔞薤白白酒湯方用栝蔞實一枚薤白半斤白酒七升藥止三味治與此例相同趙以德云寸口脈沉遲者陽氣微也關上小緊者胃以上有陰寒結聚所以胸中喘息咳唾胸背痛而短氣栝蔞性潤專以滌垢膩之痰薤白臭穢用以通穢濁之氣同氣相求也白酒熟穀之液色白上通於胸中使佐藥力上行極而下耳其次方減薤白五兩加半夏半升名栝蔞薤白半夏湯治胸痹不得臥心痛徹背以胸中痰垢積滿循脈而溢於背背者胸之腑故於前藥量減薤白之穢濁加半夏以祛痰積之痹逆千金參入枳實生薑以滌痰之藥最勝故薤白仍照本方不須裁減

枳實薤白桂枝湯 治胸痹心中痞氣氣結在胸胸滿脇下逆搶上方 枳實四枚薤白一斤桂枝一兩厚朴

三兩栝蔞實一枚 右五味咀咀以水七升煮取二升半分再服仲景方用厚朴四兩薤白半斤水五升煮取二升分一服

〔衍義〕此條金匱主以二方枳實薤白桂枝湯治痰氣結聚於胸中胸滿溢於經脈從脇下逆上以搶於心故用枳實薤白桂枝以分解之若其人素稟之虛卽用人參理中以溫散之以此證屬實者多所以千金取前方爲例不錄後方也

茯苓湯 治胸中氣塞短氣方 茯苓三兩甘草一兩杏仁五十枚 右三味咀咀以水一斗三升煮取六升去

滓爲六服日三未瘥更合服

治胸痹候胸中幅幅如滿噎塞習習如癢喉中澀燥唾沫宜此方 橘皮一斤枳實五枚生薑半斤 右三味

咬咀以水五升煮取二升去滓分再服 金匱名橘皮枳實生薑湯

〔衍義〕金匱名茯苓杏仁甘草湯夫短氣不足以息者實也卽上條平人無寒熱之例治也橘皮枳實生薑湯卽前參入栝蘘湯中二味皆利氣之劑一疏肺氣於上一疏胃氣於中也

治中湯 治胸痹方 方見二十卷勝臑腑霍亂門

通氣湯 治胸滿短氣噎塞方 半夏八兩生薑六兩橘皮三兩吳茱萸 四十枚 右四味咬咀以水八升煮取

三升分三服 一方無橘皮用桂心二兩

〔衍義〕胸痹滿痛短氣皆由痰濕痹著加以噎塞則又木邪乘土胃中陽氣不得宣通之故故取金匱生薑半夏湯合橘皮湯二方并採吳茱萸湯之半以散胃中濁垢兼疏肝氣之逆也

細辛散 治胸痹達背短氣方 細辛 甘草 各二兩 枳實 生薑 栝蘘實 乾地黄 白朮 各三兩 桂心 茯苓

各五兩 右九味治下篩酒服方寸匕日三

〔衍義〕胸痹達背噎痛胸中大氣不布致濁痰瘀垢攻衝背膺故用薑桂細辛辛溫利竅枳朮苓甘甘溫健

脾栝蘘滌痰地黃滋血乃橘皮枳實生薑湯之變法也

蜀椒散 治胸痹達背方 蜀椒 食茱萸各一兩 桂心 桔梗各三兩 烏頭半兩 豉六兩 右六味治下篩食後

酒服方寸七日三

〔衍義〕胸痹達背隱痛而無噎塞短氣胃雖阻逆當非實滿可知故但須椒與薑桂以散寒結桔梗香豉以導虛逆崔氏烏頭丸之變方也

前胡湯 治胸中逆氣心痛徹背少氣不食方 前胡 甘草 半夏 芍藥各二兩 黃芩 當歸 人參 桂

心各一兩 生薑三兩 大棗三十枚 竹葉一升 右十一味咬咀以水九升煮取三升分四服○又方 前胡 甘

草 半夏 芍藥 人參 茯苓 生薑 麥門冬 錫各三兩 黃芩 當歸 桂心各一兩 大棗三十枚 右十

三味咬咀以水一斗四升煮取三升去滓分二服

〔衍義〕胸痹多由寒熱之邪痹著心下故金匱咸以辛溫散結滌除痰垢為務千金補所未逮復立前胡湯

二方以治風熱內蘊逆氣上攻之證專取前胡之祛風下氣參入桂枝湯中更加半夏以滌痰垢參歸以助

氣血竹葉以泄風熱旺氣也 又方 卽於前湯中加麥門冬茯苓清心利水功勝竹葉并入膠飴以緩急

痛內補建中湯成法也

熨背散 治胸背疼痛而悶方 烏頭 細辛 附子 羌活 蜀椒 桂心各五兩 芎藭一兩 右七味治下

篩帛裏微火炙令煖熨背上取瘥乃止慎生冷如常法

〔衍義〕背者胸之腑烏附蜀椒內服則溫經絡外熨則通腠理佐以辛桂芎藭開導血氣羌活專行香附以子邪之出路變烏頭丸爲熨法也

下氣湯 治胸腹背閉滿上氣喘息方

杏仁四七枚 大腹檳榔二七枚

右二味咬咀以童子小便三升煎取一

升半分再服會患氣發輒合服之

〔衍義〕借茯苓湯中杏仁以下氣配大腹檳榔以泄滿更需童子小便導之下行然惟初病氣實者爲宜

檳榔湯

主破胸背惡氣聲音塞閉方

檳榔極大者四枚小者八枚

右一味二品咬咀以小兒尿二升半煮減一升

去滓分三服頻與五劑永定

〔衍義〕氣病聲音塞閉故專取大腹檳榔以破惡氣兼小者以散滯血而聲自通矣

灸法

胸痹引背時寒間使主之 胸痹心痛天井主之 胸痹心痛不得息痛無常處臨泣主之 胸痹心痛灸膻

中百壯穴在鳩尾上一寸忌鍼 胸痹滿心痛灸期門隨年壯穴在第二肋端乳直下一寸半

頭面風第八方九十二首

芎藭酒 治腦風頭重頸項強眩淚出善欠目欲眠睡憎風劇者耳鳴滿肩眼疼悶吐逆眩倒不自禁諸風

乘虛經五臟六腑皆爲癩狂諸邪病悉主之方 芎藭 辛夷 天雄 人參 天門冬 柏子仁 磁石

石膏 茵芋 山茱萸 白頭翁 桂心 秦朮各二兩 松蘿 羚羊角 細辛 薯蕷 菖蒲 甘草各二兩

雲母一兩燒令赤研為粉 防風四兩 右二十一味咬咀以酒二斗漬七日初服二合漸加至五合日三有女人少時

患風眩發則倒地為婦積年無兒服此酒并將紫石英門冬丸服之眩瘥生兒平復紫石英門冬丸見前婦人門中

〔衍義〕諸風之患良由心包之火擾動於外故見證種種究其所由不離內火招風是以頭風眩暈牽引遊

風等證諸治悉歸附此如芎藭酒治腦風吐逆癩狂諸邪專以祛風散結清心安神鎮攝虛火為主方中芎

藭辛夷天雄石膏茵芋羚羊白頭翁秦朮松蘿細辛防風一派皆祛風散結之藥兼人參柏仁天冬薯蕷膏

蒲甘草清心安神之劑以滋風藥之性磁石山茱萸桂心雲母鎮攝虛火使不上乘心包漬之以酒行其藥力

也

參湯 治頭眩屋轉眼不得開方 人參 當歸 防風 黃芪 芍藥 麥門冬各一兩 獨活 白朮 桂心

各三兩 右九味咬咀以水一斗煮取三升分三服

〔衍義〕方合保元生脈四君四物建中等方各二平調精津血氣兼取獨活防風透入參芪歸芍劑中并賴

桂心以行其勢允為虛風眩暈之神丹也

防風湯 治風眩嘔逆水漿不下食輒嘔起即眩倒發有時手足厥冷方 防風 防己 附子 乾薑 甘

草各一兩 椒 桂心各二兩 右七味咬咀以水四升煮取二升分三服日三古今錄驗有白朮一兩 ○又方 治頭風

眩倒眼旋屋轉腦痛方 防風 枳實 杏仁 芎藭各三兩 茯苓 麻黃 前胡 半夏 生薑各四兩

辛二兩竹瀝三升 右十一味咀以水六升合竹瀝煎取二升七分三服頓服三兩劑佳

〔衍義〕前方主風眩嘔逆手足厥冷不但中焦式微抑且邪乘虛陷非椒薑桂附無以搜坎陷之邪 又方

治風痰上盛故用防杏麻前芎辛以散表苓半枳薑竹瀝以滌痰一主本虛一治邪實兩不移易之定法

茵芋湯 治風虛眩眼暗方 茵芋一分人參 甘草 茯苓 黃芪 茯苓 秦朮 厚朴 烏喙各二兩 防

風六兩山茱萸 松實各二兩 右十二味咀以水一斗煮取二升半分五服強者一日夜盡羸劣者二日盡

〔衍義〕茵芋烏喙風毒方中瞑眩之藥佐以防風黃芪助以參苓甘草更須茯苓山萸以實下元厚朴秦朮

推陳致新松實清潤疏風深得補瀉兼濟之妙但烏喙太毒宜以烏頭代之

鴟頭酒 治頭風眩轉面上遊風方 飛鴟頭五枚 茯神一方 防風 芎藭 薯蕷各四兩 葛根 桂心 細辛

人參 天雄 乾薑 枳實 貫衆 蜀椒各三兩 獨活一兩 山茱萸 麥門冬一作天門冬 石南一作石膏 右

十八味咀咀絹囊盛清酒四斗漬六宿初服二合日再稍加以知為度

〔衍義〕鴟性稟陰毒而能旋風健搏故千金聖惠用其頭以治頭風眩轉及面上遊風總取以毒攻毒而已

然須以溫補煖腎藥及風藥佐之方克有濟

大三五七散 治頭風眩口喎目斜耳聾方 天雄局方用附子 細辛各三兩 山茱萸 乾薑各五兩 薯蕷 防風各七兩

右六味治下篩以清酒服五分七日再不知稍加千金翼云亦治面骨疼痛

小三五七散 治頭風目眩耳聾方 天雄三兩 山茱萸五兩 薯蕷七兩 右三味治下篩以清酒服五分七

日再不知稍增以知為度

〔衍義〕頭風多緣腎水不充痰濕上盛故大三五七散以天雄之純陽峻補三焦壯火祛邪本經治大風寒

濕痺歷節痛拘急破積聚邪氣佐以山茱萸逐寒濕痺薯蕷治傷中補虛羸細辛主頭痛腦痛防風治大風

頭眩痛乾薑逐風寒濕痺皆頭風門中頂門之錐 小三五七散專主腎肝虛風原無客邪侵擾故去細辛

乾薑防風但取薯蕷山萸以緩天雄之性虛風得以自除矣

茯神湯 治風眩倒屋轉吐逆惡聞人聲方 茯神 獨活各四兩 黃芪 遠志 防風各五兩 生薑三兩 人參

白朮 甘草 附子 菴蓉 當歸 牡蠣各二兩 右十三味咀咀以勞水一斗二升煮取三升服五合一

日夜盡

防風散 治頭面風在眉間得熱如蟲行或頭眩目中淚出方 防風五兩 桂心 天雄 細辛 人參 附

子 烏頭 乾薑 硃砂各二兩 莽草 茯苓 當歸各一兩 右十二味治下篩酒服方寸七日三〇又方

治風頭眩惡風吐冷水心悶方 防風二兩 桂心一兩 天雄翼方作人參 細辛 附子 薯蕷 澤瀉一作澤蘭 茯苓

各一兩 乾薑半兩 白朮二兩半 右十味治下篩酒服方寸七常令酒氣相接則脫巾帽解髮梳頭百過復投一

升酒便洗手足須臾自熱解髮以粉粉之快然便熟眠愈亦可洗頭面汗出

翼云如服寒食散法

〔衍義〕 茯神湯治風眩吐逆惡聞人聲脾胃虛風挾陰火而上逆故用朮附統攝虛風保元固護衛氣歸芪

溫補營血伏神遠志交通心腎菴蓉牡蠣益精收澀獨活防風搜風逐邪生薑辛散發越諸藥性味也 防

風散治風眩淚出乃風毒外擾所以眉間如蟲行狀故用三建湯之天雄烏附佐莽草辛防以搜風毒參苓

乾薑兼當歸桂心以溫血氣丹砂一味安鎮心神不使毒邪干犯君主也 又方治風眩惡風吐水心悶此

陽虛水停心下故用五苓散中之四并雄附薑辛以散水逆藜蘘以療虛風防風以祛風濕也至於方後服

法豈非宿有成驗而爲詳述如此

治風眩翻倒無定方

獨活六兩石膏

蒺藜各四兩 枳實三兩一方

右四味咬咀以清酒八升煮取四升頓

服之以藥滓熨頭覆眠取汗覺冷又內鑊中炒令熱熨之

〔衍義〕 翻倒無定乃風火相煽之象方用獨活祛風石膏清火蒺藜通痺枳實開結服湯熨滓深得內外夾

攻之妙其妙全在蒺藜一味本經治骨間諸痺四肢拘攣痿膝寒陰痿短氣不足腳腫金匱治金瘡王不

留行散及外臺方多用之此卽陸英之野生者世以其賤而棄之

治患頭眩經久得瘥後四體漸羸食無味好食黃土方

麩二斤白米三斤

右二味爲末酒和併手丸如梧

子曝乾飲服三十丸日三斷食土爲效

〔衍義〕患後體羸好食黃土乃脾傷蟲積之候故以麴朮理脾運積作丸緩攻漸圖平復誠非湯藥可期應效也

治頭中五十種病方 巴戟 菊花 芎藭 乾薑 栝藎根 防風 石南 白朮 烏頭 山茱萸 附

子 細辛 薯蕷 蜀椒 乾地黃 人參 桔梗 秦朮 澤瀉 甘草 天雄 羌活等分 右二十

二味治下篩以酒服方寸匕三

〔衍義〕證患龐雜何能逐一主治提綱挈領惟辛涼祛風辛溫散結兼調先後天血氣所謂血行風自滅也

摩頭散 治同前 藺茹 半夏 蜀椒各六分 烏頭八分 桂心七分 莽草 附子 細辛各四分 右八味治下

篩以大酢和摩頭記日數三日頭膚痛四五日後一薯蕷如前十日以酢漿洗頭復摩藥即愈若生息肉并

咽喉中息肉大如榴欲塞以藥摩之即愈耳鼻齒有疾並用之良

〔衍義〕藺茹治大風惡毒半夏逐濕開痰蜀椒治寒熱痺痛烏頭治寒濕痺桂心利關節結氣莽草治頭風

癰腫附子治寒濕拘攣細辛治頭痛腦痛百節拘攣八味辛散藥中得苦酒之酸收使藥內達以搜逐病根

何憚風毒不除息肉不化耶

入頂散 治頭面脹滿腦頰偏枯發作有時狀如刀刺失聲陰陰然疼面目變青方 山茱萸 芎藭 防風

獨活各一兩半 細辛 莽草 白朮 薯蕷 牛膝 石南 甘草各一兩 烏頭 通草 菖蒲 附子 麻黃

天雄 蜀椒 桔梗 各一兩 六銖 右十九味治下篩酒服方寸七日三

〔衍義〕面目變青陰毒上侮陽位也方用小三五七散兼麻附朮三建之製加入莽草椒辛佐雄附烏麻以追毒風牛膝石南佐茱萸以逐寒痹甘桔芎藭佐薯蕷以補虛羸其餘獨活防風菖蒲通草祛風利竅又為莽草之佐使耳

杏仁膏 治上氣頭面風頭痛胸中氣滿奔豚氣上下往來心下煩熱產婦金瘡諸病方 杏仁 二升去皮尖 雙仁者不可

用 右一味搗研以水一斗濾取汁令盡以銅器燻火上從旦煮至日入當熟如脂膏下之空腹酒服一方寸七日三不飲酒者以飲服之慎猪魚蒜酢

〔衍義〕杏仁治方下等證大都取其下氣氣下則熱自解風自散

大豆酒 治頭風方 大豆 三升炒 令無聲 右一味以一斗二升瓶盛清酒九升乘豆熱即傾著酒中密泥頭七日

溫服之

〔衍義〕黑大豆入腎搜風淋酒治風毒拘攣與大豆紫湯無異病在氣分宜用杏仁在血分合用大豆涇渭

攸分臨證毋忽

治中風頭痛發熱耳頰急方 麻黃 葛根 石膏 桂心 各三兩 附子 芍藥 甘草 秦朮 防風 各二兩 生

薑五兩 右十味咬咀以水一斗煮取三升分三服覆取汗

〔衍義〕頭痛發熱頰急陰邪流入陰位雖在少陽陽明之界端非柴胡可擬非麻葛不解風毒非桂附不散  
陰邪秦朮防風生薑爲麻葛之匡佐石膏芍藥甘草爲桂附之反謀耳

薯蕷散

治頭目有風牽引目睛疼痛偏視不明方

薯蕷三兩細辛二兩

秦朮

天雄各二兩

獨活

桂心

吳茱萸

各二兩半

右七味治下篩酒服方寸七日三

〔衍義〕頭風牽引目睛偏視陰邪掩奪陽光故借三五七散之天雄以破陰邪山茱萸以收精氣薯蕷以除

虛風細辛以搜風毒桂心入肝散血通精功勝乾薑秦朮獨活逐濕祛風與防風不殊也

治頭中痛身熱風熱方

竹瀝三升升麻

生薑

杏仁各三兩

柴胡

芍藥各四兩

石膏

生葛根各八兩

右八

味吹咀以水六升合竹瀝煮取二升七合分三服

〔衍義〕頭風屬寒者多屬熱者少此但身熱風熱而無引急吐逆等患洵爲風熱無疑故以升柴葛杏生薑

升散客邪竹瀝石南芍藥滋化風濕另闢一番境界具法眼者辨之

菊花散

治頭面遊風方

菊花一兩細辛

附子

桂心

乾薑

巴戟

人參

石南

天雄

茯苓

秦朮

防己各二兩

防風

白朮

山茱萸

薯蕷各三兩

蜀椒五合

右十七味治下篩酒服方寸七日三

〔衍義〕遊風而用三五七散更加參朮椒附復參桂苓巴戟石南純是溫補下元之品略兼秦朮防己滲濕

開痹惟菊花一味專清面上遊風苟非素稟虛羸無藉小題大做

治頭面上風方 松脂 石鹽 杏仁 蜜蠟各一兩 薰陸香 二兩 草麻仁 三兩 右六味熟搗作餅淨剉百會

上髮貼膏膏上安紙三日一易若癢刺藥上不久風定

〔衍義〕前方主虛羸人面上遊風此專治頭面風熱黃水瘡故用松脂收濕杏仁潤燥薰陸止痛草麻拔毒

戎鹽莢堅蜂蠟解毒作膏貼頂上百會穴乃外治之良法

頭風摩散方 附子一枚中形者 鹽子大 右二味治下篩沐頭竟以方寸七摩頂上日三

〔衍義〕頭風摩散金匱本治中風喎僻不遂專取附子以散經絡之引急食鹽以治上盛之浮熱千金借此

以治頭面一切久伏之毒風也

治頭風方 服荆瀝不限多少取癢止○又方 蔓荊子一升為末絹袋盛以酒一斗浸七宿溫服三合日三

○又方搗葫蘆根一升酒二升漬服汗出止○又方 臘月烏雞屎一升炒令黃為末絹袋盛以酒三升浸

溫服任性常令醺酣○又方 七月七日以麻勃三斗麻子一石末相和蒸之沸湯一石五斗三遍淋之煮

取一石漬神麴二十斤令發醱黍米二石五斗熟封三七日服清一升百日身中漚皮八風胸膈五臟骨髓

伏風百病悉去

〔衍義〕荆瀝治風逐濕解熱祛痰 蔓荊子治骨間寒熱濕痺拘急 葫蘆治骨間諸痺四肢拘急痿

烏雞矢浸酒下氣除風 麻勃治惡風黑色遍身苦癢麻子潤燥祛風釀酒治十種大風殊効

治卒中惡風頭痛方 搗生烏頭以大酢和塗故布上薄痛處須臾痛止日夜五六薄逐痛處薄之須去皮○

又方 鹽一升為末以麻油二升煎一宿令消盡塗頭石鹽尤良○又方 芥子為末酢和敷頭一周時

〔衍義〕烏頭治惡風濕痹酢專收斂藥力以盡攻毒之功鹽能更堅麻油潤燥共襄解毒之力 芥子散痛

消毒豁痰利氣同一頭風取治各別所謂醫不執方合宜而用可也

〔衍義〕此後沐頭痛等方所主頭生白屑雖緣肺病究其源多由勞心動氣胞絡火炎上燦肺金所致是以

千金悉附卷末至於髮落不生鬚白禿鬢總因衝脈不充無非精血衰耗心勞則火動於中熱發則風擾於

外為患種種未遑逐一衍說姑存以備採用可也

沐頭湯 治肺勞熱不問冬夏老少頭生白屑搔癢不堪然肺為五臟之蓋其勞損傷肺氣衝頭頂致使頭癢

多生白屑搔之隨手起人多患此皆從肺來方 大麻子 秦椒各三升 皂莢半升 右三味熟研內泔

中一宿漬去滓水飽攪百遍乃用沐頭髮際更別作皂莢湯濯之然後傅膏○又方 菊花 獨活 茵芋

防風 細辛 蜀椒 皂莢 杜蘅 莽草 桂心等分 右十味作湯沐及熨之○又方 猪椒根 三兩

麻黃根 防風各二兩 細辛 茵芋各一兩 右五味以水三斗煮取一斗去滓溫沐頭○又方 蜀椒二升水

煮沐髮良○又方 葶藶子煮湯沐不過三四度愈○又方 以桑灰汁沐頭去白屑神良

治頭項強不得顧視方 蒸好大豆一斗令變色內囊中枕之○又方 常以九月九日取菊花作枕臥良○

又方 八月後取荆芥鋪狀及作枕枕頭立春日去之○又方 穿地作小坑燒令赤以水沃之令小冷內

生桃葉滿布席就臥令項當藥上以衣著項兩邊令氣蒸病上汗出良久愈若病大者作地坑亦大

犀角湯 治風毒熱頭面腫方 犀角 生薑各二兩 苦參 栝蘘根 防風各一兩 石膏六兩 青木香 黃芩

升麻各三兩 防己一兩 竹葉二握 右十一味咬咀以水七升煮取二升分三服相去十里久內消不利

防風散 治頭面遍身風腫方 防風二兩 白芷一兩 白朮三兩 右三味治下篩酒服方寸七日三

治卒中風頭面腫方 搗杏仁如膏以雞子黃合搗令相得傅帛上厚裹之自乾不過八九傳瘥

令白髮還黑方 烏麻九蒸九曝為末棗膏為丸久服之○又方 旋覆花一升 桂心一尺 秦椒一升 隴西白

芷一升 右四味治下篩并花水服方寸七日三服三十日白髮還黑禁房室

沐頭湯 治脈極虛寒鬚髮落墮令髮潤澤方 桑根白皮切三升 以水五升淹漬煮五六沸去滓洗沐髮數

數為之自不復落○又方 麻子三升 白桐葉切一 右二味以米泔二斗 煮五六沸去滓洗沐則髮長甚

有驗

治髮鬢墮落令生長方 生柏葉一升 附子四枚 猪膏二升 右三味為末膏和作三十丸用布裹一丸內泔

中煎沐髮長不落其藥密貯勿令洩氣○又方 柏子仁 附子 蔓荊子各半 右三味以烏雞膏和搗

三千杵貯新磁器中封百日出以馬鬃膏和傅頭訖巾裹之勿令見風日三傅即生肘後不用柏子仁以酒漬澤沐○又方

桑葉 麻葉等分 右二味泔煮去滓沐髮七遍長六尺○又方 羊糞灰淋湯三日一洗不過十洗大生

摩膏 治頭中二十種病頭眩髮禿落面中風者方 蜀椒 莽草各二兩 桂心 藟茹 附子 細辛各一兩半

夏 乾薑各一兩 右八味咬咀以生豬肪二十兩合搗令肪消盡藥成先沐頭令淨後以藥摩顙上日一如

非十二月合則用生烏麻油和塗頭皮沐頭令淨乃用之一次生髮如昔必效方無蜀椒莽草乾薑半夏本門摩頭散多烏頭少乾薑但分兩

同不

生髮膏 治頭中風癢白屑方 蔓荊子 附子 細辛 續斷 零陵香 皂莢 澤蘭 防風 杏仁

薑香 白芷各二兩 松葉 石南各三兩 莽草一兩 熊脂三升 松膏 豬脂 馬髻膏各二升 右十八味咬咀以

清酒醋各三升漬藥一宿明旦以馬髻膏等微火煎三上三下以白芷色黃膏成用以澤髮○又方 烏喙

三兩 莽草 石南 細辛 續斷 皂莢 澤蘭 白朮 辛夷 防風 白芷各二兩 竹葉 柏葉 松葉

各半 豬脂四升 右十五味咬咀以清酢三升漬一宿明旦微火以脂煎三上三下白芷色黃膏成去滓瀝

淨於沐髮後塗之 一方用生油三大升翼方無石南白芷用杏仁去白屑良○又方 甘松香 丁香 白芷 澤蘭 桑

白皮 桑寄生 大麻子 苜蓿 杏仁 辛夷仁 牡荊子 芎藭 防風 莽草各一兩 零陵香 吳萸

香 細辛 蜀椒各二兩 竹葉 松葉 柏葉 胡麻油 臘豬膏各一升 烏鷄肪 雁肪各一兩 右二十五味

咬咀以酢漬一宿內油膏中微火煎三上三下白芷色黃膏成去滓塗頭日二夜一髮生○又方 治髮鬢

禿落方 莽草一兩防風 升麻 白芷 薺芎各二兩 蜚蠊四枚 豹膏一作狗膏 熊膏一作雄雞膏 豬脂 馬鬃膏

驢鬃膏各半 右十一味其六味咬咀與諸膏合煎諸藥沸則下停冷復上火三五沸止絞去滓傅頭當澤

用之○又方 治眉落髮落復生方 白芷 附子 防風 芎藭 莽草 辛夷 細辛 黃芩 當歸

蜀椒各一兩 大黃半 荆蔓子一升猪膏三升馬鬃膏五合 右十四味熬膏去滓取除日日之正午拔白塗

之當日勿飲酒食肉五辛經一拔黑者更不變也

治染鬚髮方 胡粉二兩 石灰六兩絹篩熱令黃 右二味如粉以榆皮作湯和之先以皂莢湯洗髮令極淨不得

令有膩氣如曝乾夜臥以藥塗髮上令勻訖取桑葉相綴著頭巾上遍以裹髮一夜至旦取酢漿煖洗髮又

以醋泔熱煖洗髮又取生胡麻苗搗取汁三升和水煮一二沸淨瀝濯髮訖又用油湯濯之百日黑如漆○

又方 黑椹水漬之塗髮令黑○又方 鹽湯洗沐後以生麻油和蒲葦灰傅之一作治白禿 ○又方 生麻油

漬烏梅常用傅頭

治髮黃方 臘月猪脂和羊屎灰蒲灰等分傅封頭三日一度○又方 大豆五升酢漿水二斗煮取五升沐

之

治鬢髮黃赤方 燒梧桐灰用乳汁和塗傅鬢髮并肉皮鬢髮即黑

治風頭毛髮落不生方 鐵上生衣研以臘月猪脂和塗之日三亦治眉落

生眉毛方 鐵上生衣 牆上青衣 右二味等分為末水和塗之即生○又方 七月烏麻花陰乾為末以生烏麻油漬之二日一塗

治眉毛鬢髮為火燒瘡瘻毛不生方 蒲灰以正月狗腦和傅即生

治髮落不生令長方 麻子一升熬黑壓取油傅頭長髮妙○又方 多取烏麻花磁器盛密蓋深埋土中百

日出用塗髮令髮易長而黑○又方 用雁肪傅之

治鬢黃方 新剪爪甲搔令毛孔少血出以蜜塗之即生黑毛

治髮禿者方 黑熟桑椹子二升內罌中日晒三七日化為水洗瘡上三七日即生髮神效

松瀝煎 治頭瘡及白禿方 松瀝七合丹砂 雄黃 水銀研各二兩黃連三兩礬石一兩 右六味治下篩內

瀝中攪研令調以塗之先以泔清洗髮及瘡令無痂然後傅藥二日一傅三傅後當更作膿膿訖更洗凡經

三度膿出訖以甘草湯洗去藥毒前後洗十數度即瘥

治白禿髮落生白痂終年不瘥方 雌黃 雄黃各一分 雞屎白半分 松脂 菴蓉各二分 蛇狀子 遠志 五味

子各三分 兔絲子五分白蜜一分 右十味治下篩以豬脂一升二合先內雄黃次內雌黃次內雞屎白次內

松脂及蜜又次內諸藥煎之膏成先以桑灰汁洗頭燥傅之

王不留行湯 治白禿及頭面久瘡去蟲止痛方 王不留行 東南桃枝 東引茱萸根皮各五兩 蛇牀子

牡荊子 痰藜子 苦竹葉各三升 大麻仁一升 右八味咬咀以水二斗半煮取一斗洗瘡日再并療癰疽

妒乳月蝕瘡爛

松脂膏 治白禿及癰疽百瘡方 松脂六兩 礬石 杜蘅一作杜荊 雄黃 真珠 水銀 苦參 大黃 木蘭

石南 秦朮 附子各三兩 右二十味咬咀以醋漬一宿猪膏一斤半煎之以附子色黃去滓內礬石雄黃

水銀更著火三沸安濕地待凝傅上日三

治白禿方 羊肉濕脯炙令香及熱速搭上不過三四度癢勿搔之牛肉亦得○又方 新破猪肝去糞及熱

速搭上癢慎勿搔當縛定手中臥午後去之○又方 以皂莢湯淨洗乾拭後以陳久油滓塗之日三○

又方 煮桃皮汁飲之并洗○又方 麴豉二種治下篩酢和傅上○又方 大黑豆炒令焦為末和臘猪

脂熱煖以匙抄封上遍即裹著勿見風

治赤禿方 桑灰汁洗頭令淨桑椹搗傅之日中曝頭睡○又方 馬蹄灰為末以臘月猪脂傅之○又方

燒牛角灰和猪脂傅之

令髮不生方 蜂灰蠶脂相和新拔去毛即塗孔上永不生

治鬼舐頭方 燒猫兒屎以臘月猪脂和傅上○又方 猫兒毛燒灰以膏和傅之○又方 研末和蒜搗傅

日一度

孫真人備急千金要方卷十三終

孫真人備急千金要方卷十四

長洲張 璠路玉衍義

南沙席 世臣郢客校

小腸腑方凡七類

小腸腑脈論第一論一首

論曰小腸腑者主心也舌是其候也心合於小腸小腸者受盛之腑也號監倉吏重二筋十四兩長二丈四尺

廣二寸四分

難經甲乙云長三丈二尺大二寸半徑八分分之少半也

後附脊左回疊積其注於回腸者外傳膈上回運環反十六曲常留

水穀二斗四升其一斗二升是水一十二升是穀應主二十四氣也

難經六十六曲盛穀二斗四升水六升三合合之太半甲乙云受三斗三合合之太

半脣厚人中長以候小腸小腸病者小腹痛腰脊控牽而痛時窘之復耳前熱若寒甚獨肩上熱及手小指次

指之間熱若脈滑者

脈經作陷甲乙亦同

此其候也 小腹控牽引背脊上衝心邪在小腸連牽者系屬於脊貫肝肺絡

心系氣盛則厥逆上衝腸胃動肝肺散於膏結於膈故取之膏原以散之刺太陰以與之取厥陰以下之取巨

虛下廉以去之按其所過之經以調之 左手關前寸口陽絕者無小腸脈也若膈瘳小腹中有痞瘳主月即

冷上搶心刺手心主治陰心主在掌後橫文中入一分 左手關前寸口陽實者小腸實也若心下急熱瘳小

腸內熱小便赤黃刺手太陽治陽手太陽在手小指外側本節陷中 小腸有寒心下重便膿血有熱必痔

小腸有宿食常暮發熱明復止 小腸脹者小腹臌脹引腹痛 心前受病移於小腸心咳不已則氣與咳俱

出 厥氣客於小腸夢聚邑街衢 心應皮皮厚者脈厚脈厚者小腸厚皮薄者脈薄脈薄者小腸薄皮緩者脈緩脈緩者小腸大而長皮薄而脈沖小者小腸小而短諸陽經脈皆多紆屈者小腸結 肩鵠云手少陰與太陽為表裏所以表清裏濁清實濁虛故食下腸實而胃虛故腑實而不滿實則傷熱熱則口張口為之生瘡虛則傷寒寒則便泄膿血或發裏水其根在小腸先從腹起方見治水篇中 小腸絕不治六日死何以知之髮直如乾麻不得屈伸自汗不止一手太陽之脈是動則噤痛頰腫不可以顧肩似拔臍似折是主液所生病者耳聾目黃頰頰腫頸肩臍肘臂外後廉痛 經脈支別已見心臟門中

小腸虛實第二 脈二首 方三首 灸法二首

小腸實熱 左手寸口人迎以前脈陽實者手太陽經也病苦身熱來去汗不出心中煩滿身重口中生瘡名

曰小腸實熱也

柴胡澤瀉湯 治小腸熱脹口瘡方 柴胡 澤瀉 橘皮 一作桔梗 黃芩 枳實 旋覆花 升麻 芒硝 各三兩

生地黄 切一升 右九味咀以水一斗煮取三升去滓內硝分二服

〔衍義〕小腸腑充受盛職司化物而行君主之令統三焦之權以握中外之機中氣盛則大氣敷布出內有

常中氣衰則清濁不分泄利無度火性易起易滅滅則四大分崩起則一身擾亂如柴胡澤瀉湯首治火氣

外擾熱脹口瘡故以升柴升散於上旋橘開發於中芩澤分利於前硝黃蕩滌於後四通分泄其源庶免遷

延之患然恐藥力過峻卽以地黃保護心包不使熱邪干犯九五也

大黃丸 治小腸熱結滿不通方 大黃 芍藥 葶藶各三兩 大戟 朴硝各二兩 巴豆七枚 杏仁五十枚 右七

味爲赤蜜和丸如梧子飲服七丸小兒服二三丸日二熱去日一服

〔衍義〕熱結不通不用承氣陷胸者以小腸雖居下位治節却在中上二焦故取葶藶專攻心下逆滿杏仁

開發肺氣於上硝黃蕩滌痰垢於下杏仁力綿更借備急丸中巴豆以佐之硝黃性下復採十棗湯中大戟

以激之芍藥一味專護營血卽柴胡澤瀉湯中用地黃之意

灸法

小腸熱滿灸陰都隨年壯穴在俠中腕兩邊相去一寸是 小腸泄痢膿血灸橫舍一百壯小兒減之穴在俠

臍兩邊相去各一寸又灸小腸脬七壯

小腸虛寒 左手寸口人迎以前脈陽虛者手太陽經也病苦顛際偏頭痛耳頰痛名曰小腸虛寒也

治小腸虛寒痛下赤白腸滑胸中懊懣補之方 乾薑三兩 當歸 黃柏 地榆各四兩 黃連 阿膠各二兩 石榴

皮三枚 右七味咬咀以水七升煮取二升五合去滓下膠煮取膠烊盡分三服

〔衍義〕利下赤白而見胸中懊懣虛煩滑脫可知駐車丸中薑連以導虛熱歸膠以和營血參入黃檗以堅

腸滑地榆榴皮以固血脫也

舌論第三論一首

論曰舌者心主小腸之候也善用機衡能調五味也凡有所啖若多鹹則舌脈凝而變色多食苦則舌皮槁而外毛焦枯多食辛則舌筋急而爪枯乾多食酸則舌肉肥而脣揭多食甘則舌根痛而外髮落又曰心欲苦肺欲辛肝欲酸脾欲甘腎欲鹹此五味內合五臟之氣也若臟熱則舌生瘡引脣揭赤若腑寒則舌本縮口噤脣青寒宜補之熱宜瀉之不寒不熱依臟腑調之

風眩第四論一首 方九首

灸法一首 食禁一首

前卷既有頭面風方風眩不當分出蓋以此是徐嗣伯方不可以餘方相雜故此特立風眩方條專出徐氏方焉

徐嗣伯曰余少承家業頗習經方名醫要治備聞之矣自謂風眩多途諸家未能必驗至於此術鄙意偏所究也少來用之百無遺策今年將衰暮恐淹忽不追故顯明證論以貽於後云爾 夫風眩之病起於心氣不定胸上蓄實故有高風面熱之所爲也痰熱相感而動風風火相亂則悶瞽故謂之風眩大人曰癩小兒則爲癩其實則一此方療治萬無不愈但恐證候不審或致差違大都忌食十二屬肉而奔豚爲患發多氣急氣急則死不可救故此二湯是輕重之宜勿因此便謂非患所治風眩湯散丸煎共有十方凡人初發宜急與續命湯困急時但度灸穴便火鍼鍼之無不瘥者初得鍼竟便灸最良灸法次列於後余業之以來三十餘年所救活

者數十百人無不瘥矣後人能曉此方幸勿參以餘術焉

續命湯 治風眩發則煩悶無知口沫出四體角弓反上口噤不得言方 竹瀝一升 生地黃汁一升 龍齒半

生薑 防風 麻黃各四兩 防己三兩 石膏七兩 桂心二兩 附子三分 右十味咬咀以水一斗煮取三升分

三服有氣加附子作一兩紫蘇子五合橘皮半兩已服續命湯口開四肢尚未好定而心中尚不除者紫石湯主之方見後紫石煮散是也

〔衍義〕續命湯衍義已見前八卷諸風門中此續命方治風眩煩悶但取麻黃防風桂心附子石膏生薑六味開拓表裏陰陽調適經府寒熱乃加竹瀝以治經絡四肢膜外之痰地黃以治周身臟腑癆瘵之血龍齒以治驚癇諸癎疾狂走防己以治中風變急風熱諸癎服後口開肢廢癎瘳不除者服紫石散即金匱附方除熱癎癇風引湯是也

黃豚湯 治氣奔急欲絕方 吳茱萸一升 石膏 人參 半夏 芎藭各三分 桂心 芍藥 生薑各四兩 生烏

根 茯苓各十分 當歸四兩 李根皮一斤 右十二味咬咀以水七升清酒八升煮取三升分三服

〔衍義〕奔豚湯金匱主治氣上衝胸往來寒熱奔豚雖屬腎積而實衝脈為病氣上衝胸者陰邪上逆也往來寒熱者邪正交爭也衝主血故以芎歸芍藥和其淤積之血半夏生薑滌其堅積之痰葛根以通津液李根以降逆氣並未嘗用少陰之藥設泥奔豚為腎積而用伐腎之劑謬之甚矣嗣伯治風眩氣奔欲絕故以

桂苓祛風人參壯氣萊菔降逆石膏開泄旺氣爲之必需金匱治奔豚寒熱正當用等味而反不用乃以甘草和腹痛黃芩解寒熱者以有形之滯不能速除不若緩攻爲得也設其人元氣委頓奔豚固結進用此方未爲不可

防己地黃湯

治言語狂錯眼目霍霍或言見鬼精神昏亂方

防己

甘草

各二兩

桂心

防風

各三兩

生地黃

五斤別切勿合藥漬疾輕小一斤

右五味咀咀以水一升漬一宿絞汁著一面取滓著竹篋上以地黃著藥滓上於五斗

米下蒸之以銅器承取汁飯熟以前藥汁合絞取之分再服

〔衍義〕

此治風眩病言語狂錯精神昏亂與金匱治病如狂狀獨語不休皆驚痰堵塞於心包亂其神識所致故以防己逐其痰氣防風瀉其木邪桂心通其關竅地黃安其本神甘草專和桂心地黃寒熱之性也

薯蕷湯

治心中驚悸而四肢緩頭面熱心胸痰滿頭目眩冒如欲搖動方

薯蕷

麥門冬

人參

各四兩

地黃

前胡

各八分

枳實

遠志

生薑

各三分

茯苓

茯神

各六分

半夏

五分

甘草

黃芩

竹葉

各二分

秫米

右十六味咀咀取江水高舉手揚三百九十下量取三斗煮米減一斗內半夏復減九升去滓下藥煮取四

升分四服無江水處以千里東流水代之

〔衍義〕

靈樞半夏湯本治厥氣客於臟腑衛氣獨衛其外不得入於陰陰虛故目不瞑飲以半夏湯一劑陰

陽一通其臥立至其病新者覆杯則臥汗出則已久者三飲而已蓋取半夏以通其陽流水以通其陰秫米

滋其氣化以安神識嗣伯推廣其意類加益氣通神之品治驚悸眩冒不寧等證仍取半夏流水秫米以行諸藥之性也

防風湯 服前湯後四體尚不涼頭目眩轉服此湯大勝宜常服但藥中小小消息隨冷煖耳仍不除癱者依

此方 防風 石膏 人參 赤石脂 生薑 龍骨 寒水石 茯苓各三分 桂心二分 紫石英一分 右

十味咬咀以水八升煮取三升分三服凡用井花水取清淨也今用江水者無泥沙穢源泉遠涉順勢歸海不逆上流用以治頭必歸於下故也

〔衍義〕服薯蕷湯四肢熱尚未除頭目轉覺眩暈虛陽不能卽斂故取風引湯中四石龍骨桂心加參苓以鎮固之生薑開發中氣防風開發表氣風引湯專取大黃引風熱下行此以人參助防風上泄仍取江水煮服乃薯蕷湯之成法半夏湯之變法也

薯蕷丸 治頭目眩冒心中煩鬱驚悸狂癲方 薯蕷二十分 甘草二十分 鹿角膠金匱作阿膠 大豆黃卷 桂心各七分

乾地黄 神麩 當歸 人參各十分 麥門冬 防風 黃芩金匱無 芍藥 白朮各六分 柴胡 桔梗 茯苓

杏仁 芎藭各五分 白斂 乾薑各三分 大棗一百枚取膏 右二十二味爲末棗膏和白蜜丸如彈丸先食服一丸

日三

〔衍義〕夫頭目眩冒心中煩鬱驚悸狂癲與金匱虛勞諸不足風氣百疾之治無異總由腎氣本虛風上

盛或表邪不解涼藥誤投傷犯脾肺而成虛勞是以立方專取桂苓和營散邪薑朮兼理藥誤君以薯蕷大  
理脾肺豆卷神麩除濕運痰毫不及乎補益腎肝此治眩冒煩鬱驚悸狂癩之疾狂癩雖氣之虛實由木盛  
生火生痰所致故其治咸不出和營理脾等法也金匱以補虛為務故用阿膠嗣伯以眩冒為主故用鹿膠  
用黃芩者取以散標熱之上盛也

薯蕷煎 薯蕷二十分 甘草十四分 澤瀉 人參 黃芩各四分 當歸 白朮 桂心 防風各三分 麥門冬 山茱萸

桔梗 芍藥 紫苑 大豆黃卷 乾地黄 白朮 芎藭 乾薑 蜀椒各二分已上二味並用搗篩 生地黄十八斤

汁煎令餘半 麋鹿髓 鹿角膠各半斤 麻子仁研蜜各三升 大棗八十枚 桑根白皮五升忌岡上自出土者大毒大忌近離屋垣墻下溝瀆邊者皆不中用也

右二十七味以清酒二斗四升煮桑白皮麻子仁大棗得一斗去滓次下地黄汁鹿膠髓蜜煎減半內諸朮  
併煎令可丸如雞子黃大飲服一枚日三稍加至三丸

〔衍義〕此卽薯蕷丸之變方於前方除去柴胡杏仁茯苓神麩四味參入澤瀉山茱萸紫苑蜀椒生地黄麋  
鹿髓麻子仁桑根皮等八味其兼補腎肝之義與前稍殊

天雄散 治頭目眩暈屋轉旋倒方 天雄 防風 芎藭 人參 獨活 桂心 葛根各三分 莽草四分 白

朮 遠志 薯蕷 茯神 山茱萸各六分 右十三味治下篩先食以菊花酒服方寸七日三漸加至三七

以知爲度菊花酒法九月九日取甘菊花曝乾作末於米饋中蒸作酒

〔衍義〕真元下虛風毒上盛而致頭目眩暈屋轉旋倒故用人參茯神萸積白朮山萸桂心芎藭遠志填補脾胃莽草天雄獨活防風葛根專祛風毒也

人參丸 治心中恍惚不定方 上黨人參 鬼臼 鐵精 牛黃 雄黃 大黃 丹砂 菖蒲 防風各  
一兩 蜥蜴 赤足蜈蚣 各一枚  
右十一味爲末蜜丸如梧子大用前菊花酒服七丸日三夜一稍加之合藥勿  
用青紙忌見婦人青衣喪孝不具足人及濁穢六畜雞犬等

〔衍義〕九味祛風鎮心藥中獨取上黨人參以護心安神大黃辟除風毒用菊花酒專清頭目之風也 按  
上黨人參形類參蘆乃沙參中一種最道地者以其無寒降之患有清補之功故以人參目之

### 灸法

其法以繩橫度口至兩邊既得口度之寸數便以其繩一頭更度鼻盡其兩邊兩孔間得鼻度之寸數中屈之  
取半合於口之全度中屈之先覓頭上迴髮灸之以度度四邊左右前後當繩端而灸前以面爲正並依年壯  
多少一年凡三灸皆須瘡癢又灸壯數如前若連灸火氣引上其數處迴髮者則灸其近當鼻也若迴髮近額  
者亦宜灸若指面爲癩則闕其面處然病重者亦不得計此也 禁食十二相屬肉物皆不得食其爲藥則牛  
黃龍骨齒用不可廢

### 風癩第五

論四首 方三十六首  
針灸法五十八首

論曰黃帝問曰人生而病癩疾者安所得之岐伯對曰此得之在腹中時其母數有所大驚也氣上而不下精氣并居故令子發爲癩疾病在諸陽脈且寒且熱諸分且寒且熱名曰狂刺之虛脈視分盡熱病已而止病癩初發歲一發不治月一發不治四五日一發名曰癩疾刺諸分其脈尤寒者以鍼補之病已止癩疾始生先不樂頭重直視舉目赤其作極已而煩心候之於顏取手太陽陽明太陰血變而已癩疾始發而反強因有脊痛候之足太陽陽明太陰手太陽血變而已癩疾始作而引口啼呼甲乙作喘悻者候之手陽明太陽右強者攻其左左強者攻其右血變而止治癩疾者常與之居察其所當取之處病至視之有過者卽瀉之置其血於瓠壺之中至其發時血獨動矣不動灸窮骨二十壯窮骨者尾骶也 骨癩疾者頷齒諸膾分肉皆滿而骨偃強直汗出煩悶嘔多涎沫氣下泄不療 筋癩疾者身拳攣急脈大刺項大經之本杼嘔多涎沫氣下泄不療 脈癩疾者暴仆四肢之脈皆脹而從滿脈盡刺之出血不滿俠項灸太陽又灸帶脈於腰相去三寸諸分肉本膾嘔多涎沫氣下泄不療 治癩者病發而狂面皮厚敦敦者死不療 凡癩發則臥地吐涎沫無知若強掠起如狂及遺糞者難療 癩疾脈搏大滑久自己脈沉小急實死不療小牢急亦不可治脈虛可療實則死矣厥成爲癩疾五臟不平六腑閉塞之所生也厥成爲癩故特附厥於此條也陰衰發熱厥陽衰發寒厥 論曰黃帝問曰厥之寒熱者何也岐伯對曰陽氣衰於下則爲寒厥陰氣衰於下則爲熱厥問曰熱厥必起於足下者何也對曰陽氣起於足三趾之表集於足下而聚於足心故陽勝則足下熱也問曰寒厥必起於五趾而上於膝

者何也對曰陰氣起於五趾之裏集於膝而聚於膝上故陰氣勝則從五趾至膝上寒其寒也不從外而從內也厥或令人腹滿或令人暴不知人或至半日遠至一日乃知人者何也陰氣盛於上則下虛下虛則腹滿腹滿則下氣重上而邪氣逆逆則陽氣亂亂則不知人巨陽之厥腫首頭重足不能行發為胸仆陽明之厥癰疾欲走呼腹滿不得臥面赤而熱妄見而妄言少陽之厥暴聾頰腫而熱脇痛脾不可以運太陰之厥腹滿脹脹後不利不欲食食則嘔不得臥少陰之厥舌乾溺赤腹滿心痛厥陰之厥小腹腫痛脹溼溼不利好臥屈膝陰縮腫脰內一作外熱盛則瀉之虛則補之不盛不虛以經取之上寒下熱先刺其項太陽則留之已則火熨項與肩甲令熱下冷乃止所謂推而上之者也上熱下寒視其虛脈而陷下於經絡者取之氣下而止所謂引而下之者也刺熱厥者留鍼反為寒刺寒厥者留鍼反為熱刺熱厥者二陰一陽刺寒厥者二陽一陰所謂二陰者二刺陰也所謂二陽者二刺陽也 論曰溫病熱入腎中亦為瘧小兒病痢熱盛亦為瘧凡風痞暴尸厥及鬼變不寤皆相似宜精察之故經言久厥則成癰是以知似也 論曰癰病有五一日陽癰發時如死人遺溲有頃而一二日陰癰坐初生小時臍瘡未愈數洗浴因此得之三日風癰發時眼目相引牽縱反急強羊鳴食頃方解由熱作汗出當風因以房室過度醉飲飽滿行事令心氣逼迫短氣脈悸得之四日濕癰肩頭痛身重坐熱沐髮濕結腦汗未止得之五日馬癰發時反目口噤手足相引身皆熱坐小時風氣腦熱不和得之

治五癰方

銅青

雄黃

空青

東門上雞頭

水銀

各一兩

猪苓

茯苓

人參

白芷

石長生

白斂

白薇各二兩 卷柏 烏扇各半兩 硫黃一兩半 右十五味爲末以青牛膽和著銅器中於甌中五斗大豆上蒸之

藥成丸如麻子先食服三十九日二夜一

〔衍義〕癩癧之治補瀉懸殊北方風氣剛勁見證多實非金石悍烈無以逮克敵之威南方水土柔弱見證多虛非攻中寓補奚以保乂安之策分途異治大都與中風不異如五癩丸方首尾皆列金石中間風毒雜陳卽有一二參苓不過藉以鼓動諸藥之勢良非兼補之謂乃西北癩證之的方若大江以南心勞志鬱神出舍空之證金石每多扼腕恆有以烏蠍六君鹿茸八味收功者未可執此槩論也

虎睛丸 治濕癩掣癢口眼張大口出白沫或作聲或死不知人方 虎睛一具酒浸一宿炙 鬼箭羽 露蜂房各二分

獨活 遠志 細辛 貫衆 麝香 白斂一作白薇 升麻 白蘚皮各三兩 牛黃 防風 秦朮 防葵 龍齒

黃芩 雄黃 山茱萸 防己 茯苓 鐵精 鬼臼 乾地黃一作乾薑 人參 大黃 銀屑各四分 茯苓 石

膏 天雄各五分 寒水石六分 蛇蛻皮一尺 右三十二味爲末蜜和丸如梧子大酒服十五丸日再稍加至

二十五丸神效

〔衍義〕虎睛龍齒定魄安魂牛黃麝香滌痰利竅蜂房蛇蛻攻毒祛風鐵精銀屑辟邪鎮驚雄黃石膏破惡散結防葵天雄出陰入陽升麻大黃升清降濁人參地黃導氣和血其餘風藥毒藥總皆匡佐之流耳如無

虎睛珍珠代用可也

凡癩發之候其狀多端口邊白沫動無常者治之方 秦朮 人參 防葵一作防風 茯神一作牡丹 甘草各二兩 鉛丹二兩

兩貫衆一枚 右七味咬咀以水九升煮取三升半分三服

〔衍義〕七味藥中鎮驚祛風解毒安神無不悉具

雄雌丸 治風癩失性顛倒欲死五癩驚癩方 雄黃 雌黃 眞珠各一兩 鉛二兩熬 丹砂一分 水銀八分

右六味爲末以蜜和搗三萬杵丸如胡豆先食服三丸日二稍加以知爲度古今錄驗云療五癩牛癩則牛

癩則羊鳴雞癩則雞鳴病五臟狂病者腑臟相引 益氣起寒厥不識人氣靜言狂吐沫久而得蘇者

〔衍義〕此方專以金石鎮固惟眞珠一味清心安神然病發之始切不可輕投金石閉門逐寇亦不得擅用

補益使痰承積而成固疾也

續命風引湯 治中風癩眩不知人狂言舌腫出方 麻黃 芎藭 石膏 人參 防風各三兩 桂心 甘草

獨活各二兩 防己 附子 當歸各一兩 杏仁三十枚 陳薑五兩一本無陳字 右十三味咬咀以酒三升水一斗合煎取

四升分四服日三夜一

〔衍義〕此於小續命方中去黃芩芍藥加石膏獨活以祛風熱其小續命方衍義見八卷諸風門中

紫石散 治大人風引小兒驚癩癱瘓日數十發醫所不療者方 紫石英 滑石 白石脂 凝水石 石

膏 赤石脂各六兩 甘草 桂心 牡蠣各五兩 大黃 乾薑 龍骨各四兩 右十二味治下篩爲粗散盛以韋

囊懸高涼處欲用取三指撮以新汲井水三升煮取一升二合大人頓服未百日兒服一合未能服者以綿沾著口中熱多者日四五服以意消息之

深師方只龍骨牡蠣乾  
薑滑石白石脂五味

〔衍義〕此徐嗣伯風眩門中方之一金匱名風引湯專主內發之風趙以德曰風者外司厥陰內應肝木上隸手經下隸足經中見少陽相火所以風自內發者由火熱而生也風生必害中土土病則四末不用聚液成痰癱者風木挾痰注於四肢也癩者風熱擾其筋脈內應於心主也前續命風引湯祛風外散此紫石散引風內泄故用大黃兼甘草桂心滑石石膏以化風熱乾薑以爲反譟使火無拒格之虞紫石英寒水石以潤血燥赤白石脂龍骨牡蠣以補其空絕風火復來之路也

治百二十種風癩癩驚狂發卽吐沫不識人者四月五月宜服之方 紫石英 芍藥 龍骨一作黃芩 赤石脂

白蘚皮 麻黃 當歸 甘草 栝蘘根 桂心 人參各二兩 牡蠣二兩 大黃五兩 右十三味治下飭爲

粗散分作七裹每以大棗十枚水三升煮取二升半去滓下一裹大棗汁中煎取一升去滓頓服相去七日一服服訖卽瘥

〔衍義〕採續命風引二方之要合而爲一參入蘚皮栝蘘以化外內風熱用棗湯煮取助脾氣以行藥力也

治癩癩厥時發作方 防葵 代赭 人參 鉛丹 白殭蠶 鈎藤 茯神 雷丸 虎骨 生豬齒 遠

志 桂心 防風各六兩 卷柏 葇蓉子 升麻 附子 牡丹 龍齒 光明砂各一分 牛黃二分 白斂四分

蚱蟬十四枚 蛇蛻皮 白馬睛各一具 右二十五味治下篩酒服方寸七日二亦可為丸良驗

〔衍義〕祛風毒滌頑痰破癥結利孔竅鎮驚怯和血脈安神氣莫不畢具稍嫌龐雜勢分耳

芎藭酒 治風癩引脇牽痛發則吐耳如蟬鳴方 芎藭 藁本 菌茹各五兩 右三味咀內酒一斗煮取

三升頓服羸者分三服取大汗

〔衍義〕芎藭治中風入腦頭痛藁本治風頭痛菌茹治大風惡氣皆本經主治

鴟頭丸 治風癩方 鴟頭一枚 葶藶子 鉛丹 虎掌 烏頭 栝藹根各三分 甘遂 天雄 蜀椒 大戟

各二分 白朮一分 菌茹 鐵精各一兩 右十三味為末蜜丸如梧子酒下二丸日三服

〔衍義〕烏頭天雄菌茹蜀椒破結攻毒虎掌白朮祛風滌痰鉛丹鐵精鎮攝虛邪葶藶甘遂大戟栝藹下泄

毒風鴟頭上追風毒專取旋風健搏之義

又方 治癩癩瘰癧方 鉛丹一斤 飛鴟頭二枚 右二味為末蜜丸先食服三丸日三劑者夜一稍加之

〔衍義〕鴟頭追風鉛丹鎮攝藥味專精較之前方更銳

又方 葶藶子三升搗篩以酒一斗漬半日絞去滓湯中煎令可丸先食服如小豆二丸加至如梧子二丸以

知為度額上手中從文理中赤起是知也無此候更食病日發者三日愈間日發者十日愈五日發者二十

日愈半歲發者一月愈

〔衍義〕萹葶入癩狂方皆用其子且言勿令子破破則令人發狂今曰搗篩酒漬去滓爲丸是專用其毒以攻毒也

地黃門冬酒

治陰虛癆妄方

地黃

三十斤 天門冬十斤

右二味搗取汁作煎服之

〔衍義〕千金治癩都用祛風破結此獨養正除邪益生地黃有逐血除痹之功天門冬有暴風濕痺強骨髓去伏尸之治至於釀酒爲煎補益多端豈止治風癩惡疾而已哉

天門冬酒

通治五臟六腑大風洞泄虛弱五勞七傷癥結滯氣冷熱諸風癩癆惡疾耳聾頭風四肢拘攣

退歷節萬病久服身輕延年齒落更生髮白更黑方 天門冬搗絞取汁二斗麴二升麴發以糯米二斗準

家醞法造酒春夏極冷下飯秋冬溫如人肌酸之酒熟取服一盞常令酒氣相接勿至醉吐慎生冷酢滑鷄

豬魚蒜特慎鯉魚及忌油膩此是二斗汁法一石二斗亦準此 服十日覺身體癢大癢二十日更大癢

三十日乃漸止此皆風氣出故也四十日即覺身心朗然大快五十日當風坐臥覺風不著人身中諸風悉

盡 用米法先淨淘米曝乾臨欲用時別取天門冬汁漬米乾漉炊之餘汁拌飯密封壓 取天門冬汁法

淨洗天門冬去心皮漉去水切壓取汁三四遍滓乾乃止此酒初熟味酸仍作臭泔腥氣但依式服之久停

則香美封四七日佳凡八九月少少合至十月多合擬至來年五月相續服之入四月不得合服酒時若得

散服得力更倍速散方如左

散方 天門冬去皮心曝乾搗作末以上件酒服方寸七日三加至三七久服長生凡酒亦得服

〔衍義〕天門冬本經首主諸暴風濕偏痺堅強骨髓單用一味釀酒以取專功兼散並進尤得力

### 灸法

大人癩小兒驚癇灸背第二椎及下窮骨兩處以繩度中折繩端一處是脊骨上也凡三處畢復斷繩作三折

令參合如△字以一角拄中央灸下二角俠脊兩邊便灸之凡五處故畫圖拄以丹拄所灸五處各百壯削竹

皮爲度勝繩也 卒癩灸陰莖上宛宛中三壯得小便通卽瘥翼云當尿孔上是穴 又灸陰莖頭三壯 又灸足大趾

上聚毛中七壯 又灸囊下縫二七壯 又灸兩乳頭三壯 又灸督脈三十壯三報穴在鼻直中上入髮際

又灸天臆百會各漸灸三百炷炷惟小作 又灸耳上髮際各五十壯

論曰黃帝問曰有病怒狂者此病安生岐伯對曰生於陽也陽何以使人狂曰陽氣因暴折如難決故善怒名

曰陽厥問曰何以知之對曰陽明常動太陽少陽不動而動大疾此其候也曰治之奈何曰衰其食卽已夫食

入於陰長氣於陽故奪其食卽已使之服以生鐵落爲後飯夫生鐵落者下氣疾也 論曰凡發狂則欲走或

自高賢稱神聖皆須備諸火灸乃得永瘥若或悲泣呻吟者此爲邪非狂自依邪方治之邪入於陽則爲狂邪

入於陰則爲血痹邪入於陽傳卽爲癩狂邪入於陰傳則爲痛瘡陽入於陰病靜陰入於陽病怒

驚甲湯 治邪氣夢寐寤時涕泣不欲聞人聲體中衰削仁寒仁熱腰脊強痛腹中拘急不欲飲食或因疾病

之後勞動疲極或觸犯忌諱眾諸不節婦人產生之後月經不利時下青赤白肌體不生肉虛羸瘦小便不利或頭身發熱旋復解散或一度交接彌日困極皆主之方 龜甲七枚 甘草 白薇一作白芷 貝母 黃芩各二兩 麻黃 白朮 芍藥各一兩半 防風 三兩 凝水石 桂心 茯苓 知母各四兩 石膏六兩 右十四味咀以水二斗煮取四升溫服一升日三夜一

〔衍義〕此湯治肝氣內薄陽邪陷陰之病龜甲性味與鱉甲相類首取此味入肝護陰引領麻黃桂心開發陷陰之邪白薇黃芩分解交爭之熱知母石膏寒水石專化陰分之火茯苓白朮甘草共助實脾之力芍藥收陰專瀉內動之火貝母化痰善解中氣之鬱鄰風言採其蝨蝨即貝母之別名也

九物牛黃丸 治男子沾鬼魅欲死所見驚怖欲走時有來止皆邪氣所為不能自絕方 牛黃土精 荆實木

精龍骨 水精 空青 天精 雄黃 地精 曾青 蒼龍精 玉屑 白虎精 赤石脂 朱雀精 元參 元武精 右九味名曰九精上通九

天下通九地各一兩治下篩蜜和丸如小豆先食服一丸日三稍加以知為度 翼方云凡邪病當服五邪湯九精丸

〔衍義〕夫魘魅異端正人之所不屑然陰柔細人因邪入邪往往有之有真陽素虧陰邪內結不能辟除邪

妄者有遭風失溺心神恐懼而成惑亂者有積疑難釋驚痰堵塞而妄言妄見者凡此皆驚恐悲勞所變而

千金咸以列之小腸腑者以小腸之脈上衝心貫肝肺肺病則魄不安肝病則魂不歸妄言妄見追所不免

如九物牛黃丸良由心腎本虛神志失守而為驚邪所觸故以牛黃主驚癇寒熱盛狂瘧本經原有除邪

逐鬼之治佐以荆實治風逐濕祛痰解熱曾空二青玉屑雄黃赤脂龍骨鎮攝驚妄獨取元參以導虛熱共襄配合九精之妙

十黃散 治五臟六腑血氣少亡魂失魄五臟覺不安忽喜悲心中善恐怖如有鬼物此皆發於大驚及當

風從高墜下落水所致悉主之方 雄黃 各五分 人參 各五分 黃芩 大黃 黃柏 黃芪 細辛 桂心 各三分 黃

連 黃昏 蒲黃 各一分 麻黃 各一分 黃環 澤瀉 山茱萸 各二分 右十五味治下篩未食溫酒服方寸七日三

不知加至二七羸劣者更加人參五分 一方有牛黃二分 崔氏有蜀椒五分 乾薑四分

〔衍義〕十黃散治本虛驚恐及風水外激故取雄黃以辟百邪以治陰邪濁惡之患人參黃芪桂心山萸護

持心腎血氣麻黃細辛外發肌表之邪黃芩黃連大黃黃柏蒲黃澤瀉內泄臟腑血閉惟黃昏黃環人所未

詳黃昏一名合歡本經安五臟和心志黃環本名狼跋本經治鬼魅邪氣寒熱但非常用品以故罕有識者

別離散 治男女風邪男夢見女女夢見男悲愁憂恚怒喜無常或半年數月一發動方 桂心 茵芋 天

雄 菖蒲 細辛 茜根 附子 乾薑 各一兩 白朮 桑寄生 各三兩 右十味治下篩酒服方寸七日三凡

修合勿令婦人雞犬及病者家人知見令邪氣不去禁之為驗

〔衍義〕別離散治男女風邪邪非外來風從內發用雄附桂薑熱因熱用以散肝木內動之風白朮茜根寄

生細辛菖蒲以清痰濕擾亂之竅茵芋一味專治五臟風濕毒邪也

四物驚頭散

治鬼魅方

東海驚頭

即由跋根

黃牙石

防葵

各一名

右四味治下篩酒服方寸七

欲令病人見鬼加防葵一分欲令知鬼疰者復增一分立有驗防葵莢並令人迷惑恍惚如狂不可多服

〔衍義〕

驚頭即由跋乃虎掌之細者專主風毒痰腫結熱防葵治癩癩驚邪狂走莢療內痺拘急癩狂金

牙辟瘴癘毒風惡氣四味皆瞑眩之藥而防葵莢性稟陰毒用者尤為切慎

五邪湯

治邪氣啼泣或歌或哭方

禹餘糧

防風

桂心

芍藥

遠志

獨活

甘草

人參

石膏

牡蠣

秦朮

各二兩

防己

菖蒲

茯神

雄黃

深師作黃丹

蛇蛻皮

各一兩

右十七味

咬咀以水二斗煮

取四升分四服亦可如煮散法服之

〔衍義〕

五邪湯主治驚啼歌哭邪氣曰五邪者肝風內發則為風邪治以防風獨活蛇蛻之屬二火交燭則

為熱邪治以防己秦朮白朮之屬痰迷空竅則為驚邪治以雄黃牡蠣禹糧之屬驚啼歌哭則為虛邪治以

遠志菖蒲茯神之屬凡此五邪靡不由心神怯弱所致甘草人參非特安神并佐諸藥之力病久正氣虛者

非此不能剋應

茯神湯

治五邪氣入人體中見鬼妄語有所見聞心悸跳動恍惚不定方

茯神

茯苓

菖蒲

人參

兩赤小豆四合

右五味咬咀以水一斗煮取二升半分三服

〔衍義〕

病人神氣本虛而為驚恐悲勞所傷有似鬼魅沾著而實非邪妄為患此湯最為合宜茯神安心神

茯苓守臟氣人參壯元氣菖蒲通心竅赤小豆導虛熱使丙火歸就壬水與後定志小丸開心散功用彷彿  
人參湯 治風邪鬼氣往來發作有時或無時方 人參 防風 烏頭 乾薑 栝藋根翼作桔梗澤瀉 狗脊

遠志 附子 黃芩 獨活各五分 秦朮 牡蠣 山茱萸 五味子 前胡 細辛 石膏 芎藭 蜀椒

牛膝 甘草 石南 桂心 桑白皮 麻黃 竹皮 白朮 橘皮各十銖 鬼箭羽翼作澤瀉 茯苓各十大棗六

枚 右三十二味咀咀以水六升酒六合煮取四升分五服日三夜二

虎睛湯 治狂邪發無常披髮大叫喚欲殺人不避水火方 虎睛 鴟頭 露蜂房各一具 茯苓 桂心 防

風各三兩 人參 甘草 天雄 獨活各一兩 石長生六分 楓上寄生五分 右十二味咀咀以水一斗二升煮

取三升分四服日三夜一〇又方 防葵 人參 貫衆各五兩 防風 桂心各三兩 右五味咀咀以水一斗

煮取三升分四服稍服亦可

治卒發狂方 苦參五斤為末蜜和丸如酸棗大單服十丸

治魅方 水服鹿角末方寸七日三〇又方 水服獺肝末日三

治狐狸諸色精魅作種種惡怪令人恐怖狂癩風邪方 雄黃六斤油二升 右二味破雄黃如棊子并油內

大鑊中以盆合頭作竈微火煎九日九夜不得少時火絕亦不得火冷須火熱微微不絕辟諸精魅神驗

治風邪方 商陸根三十斤去皮細切以水八斗東向竈煎減半去滓更煎令可丸如梧子大服一丸合時勿

令人見更有萸蓉方大豆紫湯皆可取汗出佳  
萸蓉方見此篇前大豆紫湯見前三卷婦人門○又方 燒蝦蟆水服方寸七日

三〇又方 水服伏龍肝方寸七日三

〔衍義〕人參湯治本氣虛寒毒邪暴虐故以參朮烏附麻黃石膏狗脊鬼箭羽羣隊交攻寒熱互舉而用

虎睛湯專取虎睛參苓定魄安神天雄桂心鴟頭蜂房石長生辟除陰毒大半出虎睛丸方餘皆截風之味

又方防葵辛寒大毒專攻癩癩驚狂貫眾辟邪毒惡氣防風治木盛生風桂心通關節結氣人參助諸藥之

力也 苦參苦寒下降專散心腹結氣 鹿角取貫頂純陽辟陰邪散血腫 獺肝治傳尸殺療殭殍邪氣

雄黃性稟純陽油煎以辟精物惡鬼邪氣 商陸性稟至陰治水腫腹脹殺鬼精物 蝦蟇灰辟邪解毒

專破陽明結積脹滿 伏龍肝取火土之餘烈以攝陰邪之內蘊也

### 鍼灸法

論曰凡諸百邪之病源起多途其有種種形相示表癩邪之端而見其病或有默默而不聲或復多言而謾說或歌或哭或吟或笑或眠坐溝渠噉食糞穢或裸形露體或晝夜行走或嗔罵無度或是蜚蠱精靈手亂目急如斯種類癩狂之人今鍼灸與方藥並主治之凡百風之家亦以風為鬼斷 扁鵲曰百邪所病鍼有十三穴凡鍼先從鬼宮起次鍼鬼信次至鬼壘又至鬼心鍼至五六穴即可知矣若是邪蠱之精便自言說論其由男從左起鍼女從右起鍼若數處不言便遍鍼穴也仍須依掌訣揅目而治之萬不失一黃帝掌訣別是術家秘

要 第一鍼人中名鬼宮從左邊下鍼右邊出 第二鍼手大指爪甲下名鬼信入肉三分 第三鍼足大趾

爪甲下名鬼壘入肉二分 第四鍼掌後橫文名鬼心入半寸即大淵穴也 第五鍼外踝下白肉際足太陽名鬼

路火鍼七鏗鏗三下即申脈穴也 第六鍼大椎上入髮際一寸名鬼枕火鍼七鏗鏗三下 第七鍼耳前髮際宛

宛中耳垂下五分名鬼牀火鍼七鏗鏗三下 第八鍼承漿名鬼市從左出右 第九鍼手橫文上三寸兩筋

間名鬼路即勞宮穴也 第十鍼直鼻上入髮際一寸名鬼堂火鍼七鏗鏗三下即上星穴也 第十一鍼陰下縫灸三

壯女人即玉門頭名鬼藏 第十二鍼尺澤橫文外頭接白玉際名鬼臣火鍼七鏗鏗三下即曲池穴也 第十三

鍼百頭一寸當舌中下縫刺貫出舌上名鬼封仍以一板橫口吻安鍼頭令舌不得動 已前若是手足皆相

對鍼兩穴若是孤穴即單鍼之 邪鬼妄語灸懸命十四壯穴在口脣裏中央絃絃者是一名鬼錄又以剛刀決斷絃乃佳 邪病臥瞑不

自知風府主之一名鬼穴 邪病大喚罵言走灸十指端去爪一分一名鬼城 邪病大喚罵走遠三里主之一名鬼邪 邪

鬼病癩四肢重頤上主之一名鬼門 邪病四肢重痛諸雜候尺澤主之一名尺中動脈一名鬼受 邪病語不止及諸雜候人中

主之一名鬼客廳 倉公法 狂癩不識人癩病眩亂灸百會九壯 狂走掣癢灸玉枕上三寸一法頂後一寸灸百壯 狂邪鬼

語灸天窗九壯 狂走癩疾灸頂後二寸十二壯或灸大幽百壯 狂言恍惚灸天樞百壯 狂走癩癩灸季

肋端三十壯或灸河口五十壯穴在腕後陷中動脈是 狂癩哭泣灸手逆注三十壯穴在左右手腕後六寸 狂癩風癩吐舌灸

胃腕百壯 狂邪發無常披髮大喚欲殺人不避水火及狂言妄語灸間使三十壯穴在腕後五寸臂上兩骨間亦治驚恐歌哭

狂走喜怒悲泣灸巨覺一作巨攪隨年壯穴在背上甲內側反手所不及骨芒穴上捻之痛者是也 狂邪鬼語灸伏兔百壯 悲哭鬼語灸天

府五十壯 悲泣邪語鬼忙歌哭灸慈門五十壯 狂邪驚癘灸承命三十壯穴在內踝後上行三寸動脈上 狂癘風驚厥

逆心煩灸巨陽五十壯 狂癘鬼語灸足太陽四十壯 狂走驚恍惚灸足陽明三十壯 狂癘易疾灸足

少陽隨年壯 狂走癘厥如死人灸足大趾三毛中九壯一云灸大敦 狂走易罵灸八會隨年壯穴在陽明下五分 狂

癘驚走恍惚噴喜笑罵歌哭鬼語悉灸腦戶風池手陽明太陽太陰足陽明陽蹻少陽太陰陰蹻足跟皆隨年

壯 驚怖心忪少力灸大橫五十壯 狂風罵詈擗斫人名為熱陽風灸兩吻邊燕口處赤白際各一壯又灸

陰囊縫三十壯令人正臥核卵上灸之勿近前中明恐傷陽氣也 狂走刺人或欲自死罵詈不息稱神鬼語

灸口吻頭赤白際一壯又灸兩肘內屈中五壯又灸背胛中間三壯報灸之倉公法神效 鬼魅灸入髮一寸百壯

又灸間使手心各五十壯 狐魅合手大指縛灸合間三七壯當狐鳴即瘥 卒狂言鬼語以甌帶急合縛兩

手大指便灸左右脇下對屈肘頭兩處火齊起各七壯須臾鬼自道姓名乞去徐徐問之乃解其手 卒中邪

魅恍惚振噤灸鼻下人中及兩手足大指爪甲令艾圓半在爪上半在肉上各七壯不止十四壯炷如雀屎大

風邪灸間使隨年壯又灸承漿七壯又灸心膈七壯又灸三里七壯 卒狂鬼魘鍼其足大拇趾爪甲下入

少許即止

風虛驚悸第六方二十三首

遠志湯 治心氣虛驚悸善忘不進食補心方 遠志 乾薑 白朮 桂心 黃芪 紫石英各三兩 人參

茯苓 甘草 芎藭 茯神 當歸 羌活 防風各二兩 麥門冬 半夏各四兩 五味子二合 大棗十二枚

右十八味咀以水一斗三升煮取三升半分五服日三夜二

〔衍義〕嘗攷靈樞經脈陰陽相貫如環無端病則寒熱相移靡所底止如驚悸善忘良由心氣之虛虛則風火相乘勢必傳之於腑非若傷寒之邪流入奇經從陽維而為傳變次第也如遠志補心湯中生脈保元滋降心火理中四君固實脾土火降則心肺安土實則腎肝固五臟相牽受其益矣更須用芎藭桂心以和營血遠志茯神以利關竅羌防以祛風濕半夏以滌痰涎紫石以鎮心怯大棗以和脾氣并和諸藥性味也

又方 治中風心氣不足驚悸言語謬誤恍惚憤憤心煩悶耳鳴方 遠志 黃芪 茯苓 甘草 芍藥

當歸 桂心一方無 麥門冬 人參各二兩 附子一兩 獨活四兩 生薑五兩 右十二味咀咀以水一斗二升煮

取四升每服八合羸人服五合日三夜一

〔衍義〕前方重在脾虛不進飲食故須理中四君此方重在腎虛風火上乘故用附子獨活并藉保元歸芍以培養血氣收攝虛陽也

茯神湯 治風經五臟大虛驚悸安神定志方 茯神 防風各二兩 人參 遠志 甘草 龍骨 桂心 獨

活各一兩 白朮一兩 酸棗仁一升 細辛乾薑各半 右十二味咬咀以水九升煮取三升分三服

〔衍義〕東垣云五臟大虛驚悸必先健運中氣故首推理中薑桂實脾寧神酸棗收津除煩龍骨鎮驚安魂

辛防獨活疎理虛風遠志茯神交通心腎而神志安矣

又方 治風虛滿頸項強心氣不定不能食方 茯神 麥門冬各四兩 人參 遠志 羌活 當歸 甘草

紫石英 五味子各二兩 半夏 黃芪 防風各三兩 酸棗仁三升 生薑五兩 右十四味咬咀以水一斗三升

煮棗仁至一斗去棗內餘藥煎取三升半每服七合日三夜二

〔衍義〕風虛項強風氣在上故用保元生脈專取防風佐黃芪以禦虛風當歸輔黃芪以和營血酸棗配門

冬以滋津液紫石統五味以溫金水茯神遠志得薑半羌活祛風痰而利九竅也

補心湯 治心氣不足病苦驚悸汗出心中煩悶短氣喜怒悲憂悉不自知常苦咽喉痛口唇黑嘔吐血舌本

強不通水漿方 紫石英 人參 茯苓 遠志 當歸 茯神深師作桂 紫苑 甘草各二兩 麥門冬一升 赤小

豆三合 大棗三十枚 右十一味咬咀以水一斗二升煮取三升分三服○又方 治心氣不足多汗心煩喜

獨語多夢不自覺咽喉痛時吐血舌本強水漿不通方 紫石英 人參 茯苓 桂心各二兩 麥門冬三兩

紫苑 甘草各一兩 赤小豆二十四粒 大棗七枚 右九味咬咀以水八升煮取二升半分三服春夏服佳○又方

治奄奄忽忽朝寤暮劇驚悸心中憧憧胸滿不下食陰陽氣衰脾胃不磨不欲聞人聲定志下氣方 人參

茯苓 遠志 甘草 枳實 當歸 龍齒 桔梗各二兩 半夏 桂心各五兩 黃芪 四兩 茯苓 三兩 生薑 六兩

大棗二十枚 右十四味咬咀以水一斗二升先煮粳米五合令熟去滓內諸藥煮取四升一服八合日三夜

二〇又方 治心氣不足心痛驚恐方 遠志 蒲黃一方用人參 葛蒲 茯苓各四兩 右四味咬咀以水一斗

煮取三升半分三服〇又方 治心氣不足腹背相引痛不能俛仰方 茯苓 遠志 黃芩 乾地黄

麥門冬 石膏各四兩 半夏 桂心 附子 生薑各二兩 甘草 阿膠 糖各一兩 大棗三十枚 右十四味以十

二味咬咀水一斗煮取三升去滓內糖及膠更煎取二升二分三服此方與前心虛實篇大補心湯相重分兩不同

〔衍義〕補心湯藥味主治大率與遠志湯相彷彿以不進飲食故理中薑桂為必須此以咽痛吐血則紫苑

赤小豆為要藥 次方治獨語多夢則前方中茯苓遠志當歸正當進用而反裁汰者以仁柔無制伏龍雷

之力故易桂心以攝肝火之浮散 第三方神魂不寧故彷彿平補鎮心龍齒清魂之法兼保元歸芪以駕

馭之枳桔苓半夏聚疎滌空竅之痰涎也 第四方以有心痛故參蒲黃於參苓遠志劑中以散血為務

第五方腹背引痛不能俛仰瘀積流入經脈故屏除參芪補氣之味專取地黃阿膠滋培營血桂心附子茯

神遠志開通經竅黃芩石膏麥門冬清理肌表旺氣半夏薑棗滌除隔上頑痰甘草飴糖和脾緩急以和腹

背相引之痛 小定心湯 治虛羸心氣驚弱多魘方 茯苓四兩 桂心三兩 甘草 芍藥 乾薑 人參 遠志各二兩 大棗

十五 右八味咬咀以水八升煮取三升分四服日三夜一

大定心湯 治心氣虛悸恍惚多忘或夢驚厲志少不足方 人參 茯苓 茯神 遠志 赤石脂 龍骨

乾薑 當歸 甘草 白朮 芍藥 桂心 紫苑 防風各二兩 大棗二十枚 右十五味咬咀以水一斗二

升煮取三升半分五服日三夜二

〔衍義〕定心首宜實脾以禦陰火之逆方下所主驚弱多厲明是土氣虛寒不能營養肝木所以神魂不寧

故於桂枝湯中易乾薑桂心以溫肝脾兼參苓遠志交通心腎以安神明也 大定心湯即於前方加白朮

以理中氣輔桂心以和營血更須龍骨赤脂以鎮心肝之怯其餘茯神防風當歸紫苑則又桂心茯苓芍藥

大棗之佐也

治驚勞失志方 甘草 桂心各二兩 龍骨 防風 麥門冬 牡蠣 遠志各一兩 茯神 五兩 大棗二十枚 右九

味咬咀以水八升煮取三升分二服相去如人行九里久再進

〔衍義〕驚勞失志總由心腎不交虛風內動所致故以茯神遠志交通心腎龍骨牡蠣鎮攝虛風桂心防風

瀉達肝氣麥冬甘草大棗滋益心脾實則虛風無隙可入矣

荆瀝湯 治心虛驚悸不定羸瘦病方 荆瀝二升 茯神 白蘚皮各三兩 人參二兩 白銀十兩 以水一斗煮取二升 右三

味咬咀以荆瀝銀汁中煮取一升四合分二服相去如人行十里久進一服○又方 荆瀝二升緩火煎取

一升六合分温四服日三夜一

〔衍義〕驚悸虛羸多由風氣內動雖用人參益氣茯神安神然必首推荆瀝治風逐濕解熱消痰佐以白蘇兼祛肌表風熱白銀煮湯煎服以鎮心肺之怯也 又方 單用荆瀝煮服功力尤專

鎮心湯 治風虛勞冷心氣不足善忘恐怖神志不定方 防風 當歸 大黃 麥門冬各五兩 澤瀉 大豆

黃卷 白斂各四分 葛蒲 人參 桔梗 遠志 桂心 薯蕷 石膏各三分 乾薑 茯苓 紫苑各一兩 甘草

白朮各十分 附子 茯神各二兩 秦朮六分 粳米半升 大棗五兩 右二十四味咀咀以水一斗二升先煮粳米

令熟去滓內藥煮取四升分服日三夜一翼方不用粳米蜜丸如梧子酒服十九加至二十九

大鎮心散 治心虛驚悸夢寤恐畏方 紫石英 茯苓 防風 人參 甘草 澤瀉各八分 黃芪 白朮

薯蕷 秦朮 白斂各六分 麥門冬 當歸各五分 桔梗 大豆黃卷 柏子仁 桂心 遠志 大黃 石膏

各四分 乾薑 蜀椒 芍藥 細辛各三分 右二十四味治下篩酒服三方寸七日三 一方無紫石英茯苓

澤瀉乾薑有大棗四分蜜丸如梧子大酒下十五丸○又方 治風虛心氣驚弱恍惚失常忽嘔恚悲志意

不樂方 紫石英 白石英 硃砂 龍齒 乾地黃一本無 人參 白朮 茯苓 桂心 乾薑 天雄

附子 細辛 防風 遠志各三兩 右十五味治下篩酒服兩方寸七日三

小鎮心散 治心氣不足虛悸恐畏悲思恍惚心神不定惕惕然驚者方 人參 白朮 遠志 附子 桂

心 黃芪 細辛 乾薑 乾地黄 赤小豆 龍齒 防風 菖蒲各二兩 茯苓四兩 右十四味治下篩酒服二方寸七日三

鎮心丸 治男子婦人虛損夢寤驚悸或失精神婦人赤白注漏或月水不利風邪鬼疰寒熱往來腹中積聚

憂患結氣諸病方 紫石英 茯苓 菖蒲 肉蓯蓉 麥門冬 遠志 大黃 當歸 細辛 大豆黃

卷 卷柏 乾薑各五分 人參 丹參 防風 秦朮 澤瀉各六分 柏子仁 芍藥 石膏各三分 烏頭 桂心

桔梗 甘草 薯蕷 前胡 白朮 鐵精 銀屑 牛黃各二分 白朮 半夏各三分 廔蟲十二枚 乾地黄十二分

大棗五十枚 右三十五味為末蜜棗和搗五千杵丸如梧子酒服五丸日三加至二十丸一本無豆卷大棗

大鎮心丸 治同前凡是心病悉主之方 乾地黄六分 牛黃五分 用牛膝 羌活 桂心 秦朮 芎藭 人參

遠志 麥門冬 丹砂 阿膠 甘草 大黃 紫石英 銀屑 白朮 當歸 乾薑 防風各八分 杏仁

蜀椒各三分 澤瀉 黃芪 大豆卷 茯苓 薯蕷 茯苓 前胡 柏子仁 鐵精各五分 桑螵蛸十一枚 大棗

四十枚 右三十二味為末白蜜棗和丸酒服七丸日三加至二十丸

小鎮心丸 治心氣少弱驚虛振悸胸中逆氣屢夢錯謬忘恍惚方 紫石英 硃砂 伏神 銀屑 雄

黃 菖蒲 人參 桔梗 乾薑 遠志 甘草 當歸 桂心各二分 防風 防己 細辛 鐵精各一分

右十七味為末蜜丸如大豆飲服十丸日三加至二十丸 一方有茯苓二分為十八味

定志小丸 治心氣不定五臟不足甚者憂愁悲傷不樂忽忽善忘朝瘥暮劇暮瘥朝發狂眩者方 人參

茯苓各三兩

菖蒲各二兩

右四味爲末蜜丸如梧子大飲服七丸日三加茯苓爲茯苓丸散服之亦佳

〔衍義〕鎮心者心氣本虛風上擾煽動君火而力爲之鎮攝也君火不寧必有濁液凝聚心下以心包無

從開泄是必假道濟泌而循出路故千金列之腸腑乃取金匱薯蕷丸風氣百疾之治兼借風引湯鎮固虛

風之法鎮心湯中防風當歸麥門冬大豆卷白藪薯蕷人參白朮甘草薑茯苓桔梗皆薯蕷丸中之藥大

黃桂心石膏又從風引湯中參入加入附子一味收斂虛陽其餘菖蒲遠志茯苓紫苑秦朮澤瀉粳米大棗

不過通達上下之佐使耳 大鎮心散較前鎮心湯但少附子菖蒲紫苑粳米大棗而多紫石黃芪芍藥柏

仁蜀椒一用附子鎮攝虛陽一用紫石溫煖營血主治雖異取法則一 又方因肝腎虛火侮君主故裁去

延緩諸味首取風引湯中紫白石英龍齒薑桂鎮驚斂魂意謂前湯之附子不足而益以天雄前散之紫石

無不足而益以白石英更加硃砂龍齒兼該鎮固之力祇恐雄附過烈進用地黃陰陽兼濟之妙無以喻之

小鎮心散卽大鎮心散減去石英椒桂大黃石膏等味而進龍齒收斂肝魂赤小豆導引心火從水道開泄

也 鎮心丸兼取薯蕷丸風引湯之法尙恐石藥不能鎮固更需鐵精至重之性得純陽火練則輕浮上升

兼取銀屑鎮驚逐邪諸金石中無以過之痰在心包雖用半夏非牛黃不能透出膈膜若痰垢不除總力爲

鎮攝亦無益於治其餘前胡卷柏柏仁丹參烏頭廬蟲等味良由婦人子藏受風血室不淨之故如無此等

證當無藉此 大鎮心丸所治與前方大同 桑螵蛸收瀉小便與前方小異 小鎮心丸中硃砂雄黃鐵精 銀屑專鎮壓夢參錯薑桂參神助長於中防已防風開發上下合七方參之則鎮驚之法纖微畢具略無罅 漏矣 定志小丸與前茯苓湯立法相類彼治心悸恍惚故用茯苓赤小豆專清心包之火此治忽忽善忘 故用遠志專辟關竅之痰

紫石英酒 治久風虛冷心氣不足或時驚怖方 紫石英一斤 鍾乳 防風 遠志 桂心各四兩 麻黃 茯

苓 白朮 甘草各三兩 右九味咬咀以酒三斗春日漬五日每服四合日三不可至醉常令有酒氣

〔衍義〕久風虛冷襲於心包雖用麻黃防風不能使透膈膜故用苓桂朮甘湯和營健脾逐濕祛痰更取鍾乳之反激助雄紫石之搜逐陰邪遠志之通關利竅漬之以酒則麻黃防風得以遲緩祛之力

好忘第七方十六首

枕中方 常服令人大聰 鱉甲 龍骨 菖蒲 遠志 右四味等分治下篩酒服方寸七日三

治多忘令人不忘方 菖蒲二分 遠志七分 茯苓 茯神 人參各五分 右五味治下篩酒服方寸七日一夜

一五日後知神良

開心散 治好忘方 菖蒲一兩 遠志 人參各十分 茯苓二兩 右四味治下篩飲服方寸七日三〇又方

菖蒲 遠志 茯苓各三分 續斷 肉蓯蓉各二兩 右五味治下篩酒服方寸七日三至老不忘

菖蒲益智丸 治善忘恍惚破積聚正宜安神定志聰耳明目方 菖蒲 附子 遠志 人參 桔梗 牛

膝各五分 茯苓七分 桂心三分 右八味為末蜜丸如梧子一服七丸加至二十九日二夜一禁如藥法

〔衍義〕人之好忘有因病而心神離散腎氣失強痰涎乘虛而憑凌竅隧者則宜利竅安神神氣自復亦有素稟善忘者乃五臟皆大而緩於事神丹不能開鑿靈機令人聰慧也枕中方首取鱉甲專通任脈以益至陰次用龍骨專通衝脈以收虛陽遠志交通心腎菖蒲開發機竅以佐龜龍鎮固腎肝也 次方專收神氣虛浮故用人參助菖蒲遠志茯苓神利竅安神之方也 開心散較前方但少茯苓不須復劑也 第四方菴蓉溫補命門通利關節佐以遠志菖蒲茯苓續斷亦取滋降不使虛火上干諸竅擾亂靈明菖蒲益智丸專主腎氣虛寒不能上交於心故全用開心散四味加牛膝桂附導火歸源桔梗開通結氣以本經原有驚恐悸氣之治合開心散之菖遠參苓共襄開心利竅之功以杜虛陽上逆之患

養命開心益智方 乾地黃 人參 茯苓各二兩 遠志 肉菴蓉 兔絲子各三兩 蛇牀子二分 右七味治下

篩服方寸七日二忌食兔肉餘無忌

〔衍義〕地黃滋心血人參固中氣茯苓安神志餘皆滋補下元收攝虛陽不使上擾靈明也

八味散方 天門冬六分 桂心 茯苓各一兩 乾地黃四分 菖蒲 遠志 石韋 五味子各三分 右八味治下

篩後食或酒或水服方寸七三十日力倍六十日氣力足

治健忘方 天門冬 遠志 茯苓 乾地黃 右四味等分爲末蜜丸如梧子大酒服二十丸日三加至三

十丸常服勿絕

治好忘久服聰明益智方 龍骨 虎骨 遠志等分 右三味治下篩食後服方寸日 二

〔衍義〕健忘而用天門冬乾地黃酒養津血茯苓桂心五味子收攝虛陽菖蒲遠志交通神智石韋疎利熱邪從水道開泄也 次方四味治健忘是服八味散後虛陽稍除水道通利但用滋培利竅可以恆用無疑龍骨入肝斂魂虎骨透骨追風風從內發而上擾於竅者非此不治更取遠志交通下上以病本陰邪專力久服可以永熄虛陽恆保貞固

又方 七月七日取菖蒲酒服三方寸七飲不至醉○又方 常以甲子日取石上菖蒲一寸九節者陰乾百

日治下篩服方寸七日三耳目聰明不忘出衢州石橋寺南山○又方 七月七日麻勃一升人參三兩爲末蒸令氣

徧臨夜臥服一刀圭盡知四方之事○又方 戊子日取東邊桃枝二七枚縛著臥牀中枕之不忘○又方

常以五月五日未出時取東向桃枝作三寸木人著衣帶中令人不忘○又方 丁酉日自往市買遠志

裹著衣中角頭還作衣服之不復忘

治人心昏塞多忘易誤方 七月七日取蜘蛛網著衣領中勿令人知不忘

〔衍義〕菖蒲開竅麻勃祛風人參益氣桃枝辟邪遠志通心方雖專主總不能開鑿機竅改易本來重開生

面也至於蛛網不過取義而已

孫真人備急千金要方衍義卷十四終